

46
Dogm.

453

7

Fiche

453²

Ritschl

<36600629330013

<36600629330013

Bayer, Staatsbibliothek



40 Dogm. 453^r
Fiche

AD

Dogm. 453^r

AUDIENDAM ORATIONEM

DE

**RATIONE, QUAE INTER THEOLOGIAM DOGMATICAM ETHICENQUE
THEOLOGICAM INTERCEDIT,**

PRO

ADITU MUNERIS PROFESSORIS ORDINARII

IN ORDINE THEOLOGORUM EVANGELICORUM UNIVERSITATIS FRIDERICIAE
GULELMIAE RHENANAE

DIE XII. M. NOV. A. MDCCCLIX. H. XII. IN AULA MAGNA HABENDAM

QUA PAR EST OBSERVANTIA INVITAT

ALBERTUS RITSCHL

PHIL. ET THEOL. DR.

IN EST COMMENTATIO DE IRA DEI.

BONNAE

FORMIS CAROLI GEORGI

MDCCCLIX.

I.

Toties in libris sacris iram dei historiarum scriptores memoriae commendant, prophetae comminantur, pii deprecantur, ut eius notionem cum ad illustrandam religionem tum ad concinnandam scientiam theologicam aliquo modo pertinere recte suspiceris. Neque vero probatur diligenti biblicorum lectori commentum illud Marcionis, solis in libris Veteris Testamenti deum quendam iratum repraesentari, per Christum autem dei bonitatem tam expresse praedicantem esse, ut merito dubietur, num idem deus Iudaeis atque Christianis sese manifestaverit. Nam etiam si ad Paulum tantum respexeris, quem suae scientiae auctorem esse Marcio finxit, irae divinae praecentem illum esse, ipsa, quam Marcio agnovit, epistola eius ad Romanos indicat. Si vero sermones domini, quos evangelia canonica continent, ceteraque apostolorum documenta perlustraveris, rariora quidem, quam in Vetere Testamento, non autem obscuriora de ira dei effata reperies. Quapropter doctoribus ecclesiae officium iniunctum erat, ut in efformanda doctrina de deo etiam huic attributo ius suum servarent; idque Tertullianus, Marcionis adversarius praecipuus, ita exsecutus est, ut non solum iram iustitiae dei boni et perfecti necessariam vindicaret, sed etiam affectum illum indignationis vehementem ad movendam voluntatem dei indicia sane competere perhiberet (*adv. Marc.* I, 25. 26). Utrumque etiam Laetantius Firmianus in libro de ira dei ad Donatum scripto (cap. 5. 15—18) adversus Epicureos et Stoicos eleganti eademque sagaci demonstratione defendit. Dispicuit vero haec opinio, affectum irae deo tribuens, quippe quae indignum deo aliquid asserere videretur, sequentibus omnium aetatum theologis orthodoxis; qui quoniam notionem dei omni mutationis et passionis specie liberare nitebantur, operam dabant ut varia illa, quae in scriptura sacra de ira dei narrantur et praedicantur, ad formam iustitiae dei prorsus aequalia sibi omnique mobilitate carentis redigerent. Inter patres Iustar omnium confer Augustinum *de civitate dei* IX, 5: „Istarum nomina passionum consuetudine locutionum humanarum usurpantur, non propter affectionum infirmitatem: sicut ipse deus secundum scripturas irascitur, nec tamen ulla passione turbatur. Hoc enim verbum vindictae usurpavit effectus, non illius turbulentus affectus; in *Psalmum* VI. cap. 3: „Qui motus (furoris) non tanquam animae deo tribendus est, de quo dictum est, tu autem domine virtutum cum tranquillitate iudicas (Sap. 12, 18). Quod autem tranquillum est, non est perturbatum. Non ergo cadit in deum iudicem perturbatio, sed quod in eius ministris fit, quia per leges eius fit, ira eius dicitur;“ — *Chrysostomum de compunctione ad Stelechiū lib.* II, 4 (*Opp. ed. Montefalc. Tom. I. p. 146*): *Δαὶδ θριόν καὶ ὀργὴν λέγει τὴν ἐπίτασιν τῆς τιμωρίας· οὐδὲ γὰρ παρὰ τὸ πάθος τὸ θεῖον ἀπηλλαγμένον.* — Quibus patribus placet continuo adiungere Io. Gerhardum, illorum iudicio his argumentis adstipulantem: „Ira dupliciter considerari potest, primo materialiter, quo respectu definitur sanguinis aut caloris eius, qui circa cor est, fervor et ebullitio; secundo formaliter, quo respectu definitur appetitus doloris vicissim adversario inferendi. Neutro autem modo deo proprie tribui potest ira. Non priore, quia corporalis illa notio in incorporea dei

essentia locum non habet. Non posteriore, quia deus, utpote immutabilis ἀναρχός, dolorem aut tristitiam pati nequit, ac proinde appetitus doloris vicissim inferendi in eo non habet locum* (*Loc. theologicis*, ed. Cotta, Tom. III. p. 176). — Quum igitur Augustinus notionem irae dei per „iustum eius iudicium, quo irrogantur poenae peccatis“ (*de civ. dei* XV, 25) explicaret, non dubium reliquit, utrum actum puniendi in illo iudicio inclusum, an hoc ab illo seiunctum, utrum iram dei quocunque temporis momento agentem, an in eius animo constantem reservatam imaginaretur. „Neque enim“, dicit, „sicut hominem, ita deum cuiusquam facti sui poenitet, cuius est de omnibus omnino rebus tam fixa sententia, quam certa praescientia“. Itaque si ira dei iustam eius voluntatem puniendi peccata significat, negatio cuiusvis in deo mutationis id efficit, ut notio irae adversus peccatores a notione odii non amplius possit distingui. Nam ira talis erga adversarios affectus est, quem, postquam gestibus vel verbis vel actibus vehementibus sese inmanifestavit, poenitentia aut misericordia excipere solent. Quamobrem etiam in scriptura, quoties ira dei lectorum meditationi repraesentatur, toties fere, id quod Augustinus improprie dictum esse vult, deum irae poenituisse, vel deum ab ira ad misericordiam sese vertisse narratur. Si vero hanc inter iram et misericordiam vicissitudinem a dei voluntate necessario excludendum Augustinus censuit, metuo, ne irae odium substituerit, quod eo firmius et constantius animo insidere solet, quo minus facile ad agendum progreditur, et quod sive in animo occultatum, sive documentis quibuscunque exhibitum poenitentiae et misericordiae maxime alienum est.

Fructus quosdam suos haec ex dei aequalitate et immobilitate derivata interpretatio irae in doctrina de peccato originali ab Augustino efformata exseruit. Nam si peccatum hominem dignum poena efficit deumque ad voluntatem puniendi provocat, et si ira hanc voluntatem significat tam diu durantem, usque dum poena aut solvitur aut condonatur, sequitur, ut peccato, cui totum hominum genus alligatum esse videtur, ira dei item continua obvertatur. Quam sententiam ut ipse Augustinus animo conciperet, insuper duobus et Ioannis et Pauli dictis commotus est, quae, quam a ceteris de ira dei testimoniis quodam modo distent, magnamque in vulgari de ira dei doctrina auctoritatem habeant, iam nunc indicare lubet. Doctrina illa Augustini de peccato itemque culpa originali eum finem habet, ut vis sacramentalis, quae in remittendis peccatis versatur, baptismo etiam infantium vindicetur. Cuius sententiae tanquam firmissimum argumentum Augustinus verbum illud Pauli allegavit, Fuimus aliquando naturaliter filii irae (Eph. 2, 3). Sed addidit etiam, quod Ioannes dicit, Qui incredulus est filio, non habebit vitam, sed ira dei manet super eum (Ioh. 3, 36). Quum ergo infantes inter credentes censi non possent, contendit necessarium esse, ut ipsi pro incredulis, ideoque irae dei subiectis haberentur, nisi gratia dei baptismo in eos collata ab ira liberarentur (*de peccatorum meritis et remissione* I, 20, 21). Itaque, ut ira voluntas quaedam dei habitualis adversus peccatores esse videretur, talis opinio, ut e supposita immobilitate et immutabilitate essentiae divinae prognata erat, ita doctrina de culpa hominum originali, qua carere Augustinus non potuit, confirmabatur. Cuius doctrinae plenum et rectum sensum quam reformatores ecclesiae redintegrarent, notionem etiam irae divinae ei coniunctam in examen vocare non putarunt necessarium, sed ut firmum et indubitatum dogma theologiae evangelicae inseruerunt. Illorum vero sententiam a nobis recte explicatam esse, omissis aliorum votis, Leonardi Hutteri verba aperte confirmant: „Unde (quod omnes homines cum peccato nascuntur) fit, ut omnes homines in odio sint apud deum et natura filii irae“ (*Loc. theol.* VIII, 6).

Deinde si quaeritur, qua ratione dei ira ab hominibus tandem sese avertat, Augustinus nihil aliud docuit, quam deum, quum per Christum gratiam in locum irae substituerit, illanc per baptismum cuique homini conferat, ipsa peccatorum remissione eum ab ira sua eximere. Nondum dubitavit Augustinus, quin deus voluntatem peccatoribus infensam quantumvis fixam te-

immutabilem cum gratiosa permutare posset, eamque ob rem nondum consideravit, an forte ad Christum ipsum ira dei referri deberet. Neque Anselmus quidem Cantabrigiensis sua demonstratione, cur deus homo factus sit, hoc officium explevit. Quum vero theologi Lutherani eo usque progressi sint, ut Christum terrores et angustias vere infernales sensisse ideoque infinitam dei iram placuisse contenderent (Hutteri *loc. theol.* XII, 11; Gerhardi *loc. theol. tom.* VII, p. 55), unde demum gratia dei ad quemvis fidelem derivari posset, suo iure id obtinuerunt, quod ex Anselmi de iustitia dei doctrina recte excussa et expolita sequitur. Minime quidem facinus cum illo Rationalistarum antesignano, qui veram iustitiam dei ex eius revelatione testimoniisque scripturae sacrae cognoscere aspernatus, talem sibi iustitiae divinae notionem effinxit, qua se Iudaeis et paganis secundum solam rationem satisfecisse merito imaginari potuit (*Cur deus homo* II, 22). Si vero iustitia divina in ea lege nititur, quod „nullatenus debet aut potest accipere homo a deo, quod deus illi dare proposuit, si non reddit deo totum, quod illi abstulit, ut sicut per illum deus perdidit, ita per illum deus recuperet“ (*l. c.* I, 23), et si loco hominum Christus id praestitit, quod deus iustitiae servandae causa ab hominibus efflagitavit, theologi Lutherani theoriā Anselmianam in maiorem dei honorem excoluerunt, quam Anselmus ipse et omnes medii aevi theologi. Quis enim non videt, ius illud, quod inter deum hominesque intercedere Anselmus posuit, secundum quod Christum opere quodam supererogatorio honorem dei ab hominibus laesum restituisse perhibuit, iuri quod dicimus privato exaequari? Dignumne vero est deo, huiusmodi rationem inter ipsum atque homines statui? Ideo, siquidem iustitiam dei ad aliquam humani iuris formam redigere, et, quod Christus tanquam mediator inter deum et homines egit, secundum talem regulam explicare fas est, theologi Lutherani non possunt non laudari, quod explicando Christi operi satisfactorio normam quandam iuris publici criminalis subiecerunt. Nam utut de terroribus animi, qui Christum mortem sibi certam expectantem perturbarunt, iudicabitur, quos Lutherani indicia irae dei in eum immissae interpretabantur, iustius erit, huius sententiae radices indagare, quam cum Bellarmino (*de Christo* IV, 8) novam et inauditam impietatem detestari, quam, qui illud statuerunt, commississe videbantur. Haec vero illius opinionis ratio manifesta est, quod legem dei, quam hominum genus violasse videtur, secundum quam dei ira ei innata esse dicitur, auctoritate iuris publici instructam esse, ideoque satisfactionem Christi vicariam in omnium malorum, quae legem violatam sequuntur, perpassione constitutae oportebat. Si enim mors Christi honori dei restituendo quoddanmodo convenire videtur, deum non nisi privatam rem cum hominibus gerere statuitur; si vero exelsitatis dei solum id aequum esse potest, ut eius iustitia publicum ius hominibus praescribat, iram dei iustam, qua contra transgressores legis movetur, ille perferre debuit, quem loco peccatorum iustitiae divinae satisfecisse omnes Anselmi assectae proclamant. Sed hoc loco non uberius tractabimus eam quaestionem, quae iustitiae divinae definitio deo digna indagari possit, vel quomodo divina iustitia ab humana recte distinguatur. Quae nunc innuimus, in eum finem allata sunt, ut sententia theologorum, qui Lutherum in eo sequuntur, ut iram dei non solum peccato originali, sed etiam passioni Christi interpretandae applicent, a specie commenti arbitrarii liberaretur.

At perlustrantibus nobis opera veterum theologorum dogmatica non potest non mirum videri, quod tanta animi securitate illi dogmata tam gravia unico effato Paulino *ἐν τῷ πνεύματι* (Eph. 2, 3) superstruere conabantur. Nam nusquam certis verbis scripturae sacrae confirmatum est, Christum revera iram dei sua conscientia expertum esse, sed hoc secundum necessitatem rationis potius ex eo, quod ira dei in genus humanum legitime tollenda erat, collegerunt, et narrationi de terroribus Christi animum in Gethsemane perturbantibus quasi insinnaverunt. Praeterea autem omiserunt, imo aspernati sunt fundamentum illorum dogmatum de peccato originali et de

passione Christi examinare, et interpretationem irae dei, ab Augustino inde traditam et in scholis receptam, novis curis in scripturam sacram impensis firmare, quum a Fausto Socino in dubium esset vocata. Is enim, qua erat animi sagacitate in investigando scripturae sacrae sensu, eam, quam nunc tractamus, rem non feliciter solum, sed etiam rectius, quam theologi Lutherani et Calviniani, expedit. Hi quidem statuerunt primum, iustitiam ipsam dei essentiam, legem vero diligendi dei, quasi aeternam et immutam regulam hominibus praescriptam, speculum iustitiae divinae esse, iidemque opposuerunt iustitiae misericordiam divinam. Addiderunt porro, iustitiam dei ad genus humanum peccatis immersum non nisi per iram referri posse. Collegerunt denique, propter iustitiam dei servandam poenas irati dei a Christo solvi oportuisse, priusquam dei misericordia hominibus peccatoribus per eundem Christum adhiberetur (instar omnium confer Io. Gerhardum *Tom. I, p. 143. Tom. III, p. 171. Tom. VII, p. 30*). Contra quam seriem sententiarum haec Faustus Socius obiecit (*De Christo servatore I, 1*; confer *Praelectiones theologiae cap. 16*). „Iustitiae nomen, quum ad deum refertur, in divinis literis nunquam opponitur misericordiae, sed praecipue et plerumque rectitudinem et aequitatem significat. Ea vero res, quae ad deum relata misericordiae opponitur, non iustitia appellatur a sacris scriptoribus, sed vel severitas vel ira vel indignatio vel furor vel vindicta, vel simili quopiam alio nomine nuncupatur. Quin etiam — non minus iustus in exercenda misericordia, quam in ulciscendis iniuriis deus esse dicitur. Aequum enim est, et ideo iustum, deum promissa sua servare et resipiscentes peccatores gratia ac benignitate prosequi. — Postremo notandum est, quum iustitia, quatenus misericordiae opponitur, vere, ut dictum est, iustitia non sit, neque eo nomine in sacris literis decoretur, sed potius severitas et vindicta dici debeat, eam in deo vere non residere, nec dei esse qualitatem, seu mavis, proprietatem aliquam, sed tantummodo effectum voluntatis eius. Ea enim iustitia, quae in deo vere residet et qualitas seu proprietas eius est, adeo ut nihil ab eo fiat, quod eius sit expers, illa est, quae hac appellatione in divinis monumentis insignitur et rectitudo atque aequitas alio nomine dici potest. — Neque enim ideo punit deus perpetuo peccatores non resipiscentes, quia proprium sit eius, punire eos qui peccant, sed quia non resipiscentibus veniam non concedere, id demum naturae divinae et decretis eius et propterea rectitudini et aequitati debitum est ac consentaneum.“ Neque possumus neque volumus negare, hanc demonstrationem, a doctrina Lutherana et Calviniana tantopere alienam, etiamsi quid veri ei inest, quodammodo profectam esse ex decreto illo Sociniano minime probato de libertate dei quamvis necessitatem fugiente (confer Fock, *der Socinianismus p. 417*), ex quo consequuntur ea, quae locum laudatum Fausti proxime excipiunt, „deum, quemadmodum iure potuisset homines, licet peccantes, morti aeternae non mancipare, sic, postquam eos illi morti edicto suo mancipaverit, ex illius imperio iterum eos exinere et quidem iure sua sola voluntate potuisse.“ Hac summa de dei notione theologia Socinianorum Evangelicis, ex necessitate divinae essentiae argumentantibus, tam directo opposita est, ut nullis unquam artibus dialecticis ullam rem componere valuerint. Itaque ne mireris, Gerhardum (*Tom. VII, p. 47 seqq.*) sententias Socinianas de iustitia, ira et misericordia dei hoc tantum modo refutare, ut sua decreta repetat, eque decretis adversariorum talia consequi significet, quae ipsi nunquam agnovissent, non suspicatus, sua ipsius principalia dogmata ad doctrinas absurdas eadem ratione deduci posse. Verumtamen id quoque statuendum est, sententias illas Fausti, quas propinquius, non necessario errores Socinianos sapere, sed solida accurataque scripturae interpretatione niti. Neque id quidem praetermittendum, sed singulari laude notandum esse videtur, quod recte observavit, dei voluntatem iustam in scriptura non aequali modo ad omnes in universum peccatores referri, sed ad obstrictos in malitia aliter atque ad resipiscentes per poenitentiam. Cui quidem laudi alteram hanc adiu-

gimus, quod idem propter ipsam voluntatis divinae aestimationem animum ad ea dei decreta advertere valuit, quae in foedere cum hominibus composito cernuntur, revelationem dei gradatim fines suos patefacientis speculum iustitiae divinae clarius opinatus, quam legem quandam dei immotam ut fertur et aeternam. Quamobrem Gerhardus, ut alios taceam, vituperandus est non solum propterea, quod demonstrationibus Fausti exegeticis de iustitiae divinae notione, quas non potuit quin quodammodo agnosceret, non melius usus est, sed etiam propterea, quod in efforandis dogmatis ecclesiasticis rationibus potius de deo arbitrariis, quam revelatione ipsius dei cognoscenda nitetur.

Theologiae rationalisticae id potissimum nostris temporibus vitio vertitur, quod iram dei minimi aestimaverit, quam Hebraeos ex aevi incultioris ingenio ad tuendam legum suarum sanctitatem sibi finxisse perhibent non solum Wegscheiderus (*Institutiones theologiae*, ed. quinta p. 246), sed etiam Schleiermacherus (*Der christliche Glaube*, ed. tertia, Tom. I. p. 472), haec in re ab illa schola non dissentiens. Si igitur non inficiamur, contento tam gravi religionis biblicae momento, theologiae christianae damnum quoddam inferri, tamen id demonstrasse nobis videmur, iniuriae huius ab assecdis talis disciplinae palam commissae fundamenta occulte iam a doctoribus orthodoxis, imo a patribus ecclesiae iacta esse. Qui quum affectum irae deo indignum ac notioni divinae iustitiae detrahendum esse censerent, quid aliud Rationalistae addiderunt, quam quod, religioni historice illustrandae studentes, rationem eruere conati sunt, qua talem affectum deotribuendum esse veteres homines imaginati sunt? Neque sola haec re probatur, Rationalismum ideo in publicam ecclesiae doctrinam irreperere, fereque totam in ecclesia evangelica religionem obruere potuisse, quia iamdiu in animis theologorum orthodoxorum serpsit, imo stamina eius, ut ita dicam, a patribus intensa et ad posteros usque theologos translata erant. Sed nos ipsam in iram dei inquisituri ad id postea animum advertere debebimus, an notio iustitiae dei, per legem universalem expositae, doctoribus rationalistis et orthodoxis communis, cum ordine revelationi divinae insito recte conveniat, an potius ex ratiocinatione quadam arbitraria originem traxerit.

Utunque haec res se habet, theologi recentioris aevi pietatem laudabilem erga scripturam sacram atque studium efformandorum dogmatum ecclesiasticorum ab auctoritate receptae apud vetustiores metaphysices liberum declaraverunt, quum verae sententiae irae dei indagandae denuo operam darent. Neque in mentem sane nobis venit, eos reprehendere, quod non omnes nec pari cura, neque via recta ad definiendum problema idemque solvendum intenderunt. Libenter enim concedimus, inter varia officia excolendi scientiam de religione christiana, eamque contra quoscunque errores defendendi, nostram quaestionem non tantam vim exercere, quae praecipuum in se allicit doctorum studium. Itaque non parvi pendimus, quod Nitzschius S. V. in eo se continuit, ut veritatem sententiarum de ira dei affirmaret, quamvis ad eam explicandam ne verbum quidem adiunxerit, neque demonstraverit, cur iram dei neque ad peccatum originale neque ad passionem Christi retulerit (*System der christl. Lehre*, ed. sexta p. 176). Sed pro fine eius libri satis esse videtur, quod saltem quaestionem de ira dei in medium proposuit. — Quodsi tales recentiorum theologorum libros circumspicimus, quibus consulto disciplina dogmatica excolitur, poterit quispiam opinari, in libro Martenseniano nuperrime commendatissimo quandam de ira dei doctrinam et ipsam commendandam inveniri. Neque deest scriptor libri huic expectationi eatenus, quod de redemptione per Christum perpetrata expositurus ad definiendum dei iram commoveri se passus est. Sed ut eruditionis exegeticae negligentissimum se exhibet, — quum exempli gratia deum per mortem Christi placatum esse, non nisi verbis ex Augustana confessione excerptis probet, — ita de ira dei disserens, artem expolitam

verbis defectum accuratarum sententiarum supplendi mirum in modum exercuit. Exordium facit (*Christl. Dogmatik, Berol. 1856. p. 281*) a nota illa vetustioris dogmatices thesi, redemptionem ad solvendam contradictionem inter dei amorem et iustitiam valere; quam ita explicat, ut peccatum tanquam impedimentum divini amoris illud damnum deo ipsi intulisse dicat. Sed a via theologorum orthodoxorum, quos dicunt, statim delabitur, asserens, tum peccatum in genere humano destrui oportuisse, ut illa contradictio deo insidens tolleretur, tum ira dei significari ipsum eius amorem sanctum tanquam impeditum, quominus hominum utilitatem et salutem provehat. Praeterea addit, revelationem divini amoris, quae ab altera parte ira appellanda sit, ab altera parte quasi tristitiam spiritui amoris sancto motam contemplandam esse, per quam ira in misericordiam nutetur. Haec autem declamatio neque cum veterum theologorum dogmatis convenit, neque ad imaginem irae divinae in scriptura sacra propositam respicit, neque tandem digna, quae ad cognoscendum deum adhibeatur, ratione nititur. Nam si Martensenius doctrinam veterum restituere voluit, cuius consilii speciem initio demonstrationis suae assumpsit, oportuit eum et iram dei ad iustitiam amoris divino oppositam revocare, et docere, prius iram dei per mortem Christi placatam esse, quam peccati vis in homines tolleretur; oportuit tandem distinctis verbis eum agnoscere, Christum iram dei pertulisse, quod tamen frustra in libro eius quaeretur. Si vero scripturam sacram secutus esset, ex qua sola rectae de deo notiones concipi possunt, non potuisset imaginari debilitatem illam et mollitiem animi divini ab ira per tristitiam ad misericordiam et vice versa fluctuantis. Nam voluntas quidem dei potest cum ira misericordiam permutare, certis illa rationibus permota; nulla autem necessitudine logica illa contraria ita inter se cohaerent, ut eandem animi commotionem a diversa tantum parte consideratam significant. At mittamus tamen pravam mixturam traditionis theologicæ atque imaginationis arbitrariæ, neque saltem, neque orthodoxam minimeque veritati congruentem. — Compluria Thomasius Erlangensis (*Christi Person und Werk, Tom. I. secunda p. 347 seqq.*) de ira dei bene observavit, primum significans eam esse efficaciam divinae sanctitatis adversus personas peccato culpaque implicatas; tum declarans effectum irae proprium in perimenda vita eque dei ecclesia exstirpandis peccatoribus cerni; innuens saltem denique, iram non prorsus convenire iis, quae de ratione poenarum divinarum aut statuuntur aut disceptantur, quoniam irae manifestationes ad respicientes in poenitentia castigandos eodemque iuvandos, ad obstinate autem inobedientes deo perimendos et exstinguendos valere videantur. Si vero haec Thomasio auctore Lutheranismum sapiunt, propterea quod testimonii scripturae sacrae concordant (conf. praefationem libri laudati p. V.), si Thomasius praeterea iure „theologos ecclesiasticos“ incusat, quod notioni dei nimis tenui et nimia simplicitate laboranti studentes, iram dei non satis aestimaverint, nos quoque in suspitionem haereseos non incurramus, quod Faustum Socinum, cuius sententiae de ira dei Thomasius proxime accedit, ipsum propter scripturae veritatem in hac re detectam quasi Cryptolutheranum, laudibus debitis extulimus. Minus vero placet, quod Thomasius iram dei, priusquam ad ultimum effectum provehatur, hominem peccatorem ad cognoscendam et sentiendam culpam movere contendit. Quacrendum erit postea, an testimonia scripturae a Thomasio (p. 289) allata eam sententiam probent: notamus vero, si quid erroris in hac re commissum sit, id derivari a definitione sanctitatis dei p. 137 ab eo proposita, quam non possumus quin improbemus *). — Optime Langius collega S.V. (*Positive Dogmatik p. 119. 120*) de ira dei disputavit, disquisitionem quidem exegeticam convenienter fini libri sui praetermittens, sed irae divinae imaginem certis lineis rectissime adumbrans, atque

*) Quod ex Thomasii sententia ira dei ad passionem Christi fecerit, nondum possumus diiudicare, quia opus eius dogmaticum adhuc manere est.

exemplis rei summopere accommodatis illustrans. Poterit quidem id solum in dubium vocari, an secundum scripturam sacram suis salvandi peccatoris irae dei revera insitus sit; sed id eximie Langius docuit, deo eam ob rem iram tribui, quia indignum eo sit, secundum legem iustitiae humanae poenam culpae accurate exaequare, quia potius scelera defectionis a lego dei et obstinati adversus eius providentiam animi non possint non violentos et terribiles et ab humana expectatione longe alienos effectus potentiae eius peremptoriae excitare. Idem cautissime egit (p. 501 seqq. 517) in exponenda doctrina de peccato originali, quod maledictionem generis humani haereditariam irae dei non aequiparavit, et propterea, quamvis maledictionem illam a Christo pro hominibus patiente sensam esse perhiberet, ab ea opinione, Christum iram dei pertulisse, plane se abstinuit (p. 839 seqq.). — His tamen exemplis id opinamur nos effecisse, ut et studium commendetur, quod theologi recentioris aevi in rectius definienda ira dei ponunt, et nobis concedatur, operae pretium esse inquirere in eam rem accuratius et usum illius notionis in theologia dogmatica certis finibus circumscribere.

II.

Iam igitur investigaturi, quam materiam efformandi de dei ira certi dogmatis scriptura sacra praebeat, horum regularum summopere memores sumus, tum theologiam non obligari quibuscunque opinionibus usui ecclesiastico accommodatis iisdemque scripturae non convenientibus, tum sententias in N. T. propositas, quantumvis speciem aut claritatis aut obscuritatis prae se ferant, ex usu loquendi in Vetere Testamento sollemni rite explicandas esse, indeque explicari posse, nulla quadam regula interpretationis ecclesiastica adhibita. Libri vero sacri non continent membra systematis cuiuspiam divina mente concepti et elaborati disiecta, quae colligere suoque ordini reddere nobis tanquam theologis est iniunctum, sed testantur foedus dei cum hominibus per varios gradus excultum, per quod voluntatem suam erga hominum genus, certis finibus circumscriptam, executus est, eandemque cognitioni sociorum foederis submisit. Quaecunque igitur de dei voluntate et efficientia libri sacri prodant, praecipue in definienda ratione inter deum et socios dei intercedente versantur, ita ut omnia, quae deus cum ceteris hominibus agit, vel quae ad totum genus humanum deo comparandum pertinent, per leges foederi divino insitas illustrentur. Quaecunque tandem de deo sententias methodo theologica concinnare valebimus, ipsa haec methodus eo nititur, ut nihil de deo divinisque rebus in universum statuatur, quod non ad modum voluntatis dei in foedere condendo, conservando, defendendo, perficiendo declaratae revocatum sit. Perperam igitur imaginati sunt veteres theologi, scriptores sacros consulto docere de dei natura, de divina lege mentibus hominum naturaliter insita, de cognitione iustitiae divinae omnibus hominibus innata, de natura peccati originalis. Quod naturalismi theologi studiū a fine scripturae sacrae ingenue perspecto plane abhorret, ita ut probe intelligas, quae huiusmodi veteres theologi orthodoxi statuunt, eos non ex scriptura diligenter explicata hausisse, sed aliunde ad eam perversè interpretandam attulisse. Si quis ergo contenderet, deum luce clarius in scriptura docere, omnes homines peccato originali obstrictos eam ipsam ob causam morti aeternae obnoxios esse, quia *τέκνα γένεσι ὀυγῆς* appellantur, si quis praeterea negaret, ad hanc veritatem efficiendam ulla disquisitione in sensum dicti Paulini opus esse, nos quidem metueremus, ne talis, quan-

tumvis traditioni ecclesiasticae addictus, lumini quod dicunt naturae in intelligenda scriptura maiorem quam fas est concederet auctoritatem. Nam id, quod Paulus illis verbis declarare voluit, ab accurata omnium de ira dei testimoniorum consideratione repeti debet; iis tantum illud dictum facile ad intelligendum esse videbitur, qui ut odium dei peccato cuique adversetur, secundum naturam quandam rerum postulant potius, quam ex scriptura sacra id demonstraverunt.

In Vetere Testamento ira dei fere non commemoratur, nisi ita ut oculis sive sensibus hominum quocunque modo appareat, vel in efficienda quacunque re cernatur. Competit hic sensus quodammodo vocibus Hebraicis significando illi animi motui accommodatis: *אָה, זֶקֶה* anhelare, *זֶקֶה, קָצֵף* spumare, *חֵדֶה, חֵדֶה* ardere, *עָבַר* redundando transire fines, *קָמָה* rubrum esse, *קָצֵף, עָבַר, קָצֵף, קָצֵף*, *קָצֵף, קָצֵף*, *קָצֵף, קָצֵף*, *קָצֵף, קָצֵף*. Convenit porro usus horum vocabulorum communi usui loquendi, secundum quem ira ab odio recte distinguitur.

Effectus irae divinae varii depinguntur. Principaliter vero et secundum libros vetustiores fere unice ira dei in extinguenda subito et vehementer vita hominum (Num. 25, 11; Deut. 6, 15; 9, 8. 14. 19) ostenditur. Iuvabit potissimum observare, ignem ipsum, quo dens praesentiam suam Israelitarum genti patefecit, quantumvis sollempniter signum gratiae dei in medio populo a se electo habitantis esse solet, aliquoties etiam ad perimendos homines quosdam converti (Lev. 10, 1. 2; Num. 11, 1; 16, 35). Quamobrem deus, tanquam accumulatione honoris incensus, ignis consumens appellatur (Deut. 4, 24; Hebr. 12, 29). Sed saepius media quaedam naturalia, quantumvis miraculose mota, ad exsequendam dei iram vitamque adiuvandam trahuntur. Inter ea in libris Moaisis repraesentantur disruptio terrae, qua Korachitae deglutiuntur (Num. 16, 33), serpentes in populum saevientes (21, 6), lepra (25, 4. 5), gladius ab adversariis inferendus (Exod. 22, 23), siccitas terrae (Deut. 11, 17). Praeterea Lev. 26, 16—33; Deut. 32, 17—29 enumerantur tanquam instrumenta irae divinae omnia, quibus necesse terribiles offerri solent. Adiicimus, plagas illas, quae plerumque a deo irato populo infinguntur (Exod. 30, 12; Num. 8, 19; 17, 11. 12; Ios. 22, 17. 18), pestem quandam significare videri. Quod in his exemplis omnibus licet observari, inflictionem necis vehementem et inopinatam, et cui nulla vi humana resisti possit, ad imaginem irae divinae adumbrandam adhiberi, hoc tanquam certum eius iudicium in posterioribus libris consulto agnoscitur (Ios. 23, 16; Deut. 7, 14 cf. 2. Sam. 6, 7). Adstipulantur huic sententiae permultis comminationibus irae divinae prophetae paene omnes, quorum testimonia singulatim persequi longum est. Id solum notare nobis placet, eos praescritum impetum adversariorum bellicosos contra dei populum, necesse vario modo inde effectas (e. g. Ezech. 5, 12—17; 6, 12; 7, 15. 16; 14, 19) tanquam instrumenta irae dei tribuere solere. Quam vim peremptoriam e sententia scriptorum V. Ti. irae dei propriam esse ea quoque re confirmatur, quod et ira ad extinguendos homines a deo effusa, et procellae, quae vi fulminum et ventorum terrae fundamenta quasi labefactare videntur, narium dei cuidam motui vehementi terribilique comparantur, cui nulla creatura resistere possit (Exod. 15, 8; Ps. 18, 9—16; Iob 4, 9; 19, 5. 13. 17; Ies. 5, 25; Mich. 1, 3. 4; Ierem. 4, 23—26; 10, 10; Ezech. 13, 13—15; 38, 18 seqq. Ies. 51, 15; 66, 15—17; Nahum 1, 6 seqq. Habak. 3, 6 seqq.). — Praeterea vero iram dei ad subiciendum inimicorum potestati, inque exilium mittendum populum valere, ceteri historiarum scriptores (imprimis confer libros Iudicum, Regum, Chronicorum) nec non prophetae quidam (Deut. 29, 28; 31, 17; Ies. 10, 5. 6; Ier. 6, 11; 17, 4; 32, 37; Sach. 7, 14; Ps. 85, 2—8; 106, 40—42) auctores sunt. Nec mirum, talem effectum irae divinae neci violentae aequiparari, neque ita haec varietas sententiarum de ira dei interpretanda est, quasi diversa inter se ab eodem illo dei affectu repeti videantur. Nam Hebraei necesse per iram dei inflictas propterea tam acre tulerunt, quod vitam non solum naturalem everterunt, sed vitam in ecclesia dei exstinxerunt

(Num. 16, 33.) Quum igitur Hebraeorum religio eo niteretur, ut populus a deo electus quasi facie dei in se conversa viveret, et quum inter alia bona populo promissa etiam libertas eius et fortuna reipublicae secunda ad vitam a deo sancto sponsum pertinere viderentur, detrimenta libertatis publicae atque eversionem vitae violentam ab eadem ira dei, quippe qua deus faciem a populo suo averteret et occultaret (Ps. 27, 9; 89, 47. Deut. 31, 17. 18; 32, 19; Thren. 3, 43; Ios. 54, 8), descendere, prophetae suo iure praedicarunt. — Ab hac ratione irae dei, qua per solum effectum sensibus obiectum cognoscitur, recedere videtur ea testimonia V. Ti. non rara, quibus iram certis consiliis puniendi a deo initis subfuisse demonstratur. Huc pertinet, quod deus iratus sibi proponit, et cultores vituli aurei suo tempore perdere (Exod. 32, 10, 33—35), et populum contumacem in deserto retinere, ne ad terram promissam perveniat (Num. 32, 10—14; Ps. 95, 11), et gentes Canaanitarum non prorsus extirpare, ut fides Israelitarum religiosa tentari atque explorari possit (Iud. 2, 21, 22), et potestatem regiam proli Salomonis adinire (1 Reg. 11, 9—13), et regno Iudae ubique Ierusalem suum praesidium subtrahere (2 Reg. 23, 26, 27). Tacemus alia. Neque vero horum consiliorum ratio ab idea irae divinae antea exposita plane recedit. Etiam si enim damnum, cuius cuipiam inferendi deus iratus consilium capit, ab hoc animi divini affectu longo temporis intervallo distet, neque utrumque uno quasi oculorum obtutu comprehendere possit, tamen regula aliquando reperta in eo denique observatur, quod ira dei verbis saltem minacibus sese declarat, nec praeter talem declarationem affectui animi divini proxime adiunctam in mentes hominum venire potest. — Nam hoc postremo considerandum est, compluribus aliis locis iram dei ad verba hominibus quibusdam dicta referri. Haec in re non est difficile intellectu, mandatum poenae alienius perentoriae exequendae ab ira divina derivari (Num. 25, 4, 5; cf. 1 Sam. 28, 18; 15, 18). Tunc, quum deus iratus et Davidem verbis incitaret, ut populum numerandum curaret (2 Sam. 24), et Amaziam regem alienis deis colendis incumbentem per prophetam aliquem admoneret (2 Chron. 25, 15), utroque effatu id molitus est, ut primum populum peste quadam immittenda castigaret, porro Amaziam perditioni traderet. Restat igitur id tantum, quod deus Mosem, legationem ad regem Aegypti recusantem, irate increpuisse fertur (Exod. 4, 14). Desunt in hac de ira dei narratione perantiqua, quae de nece et perditione per illam hominibus aut inferenda aut minanda antea observavimus. Verumtamen non possumus quin ita rem expediamus, ut suspicemur, illud mandatum dei repetitum invito Moysi animo talem terrorem iniicisse, ac si de vita perdenda timere deberit. Neque illud incertum relinquitur, quale crimen ira divina dignum Moses commiserit, quum modestia motus officium a deo sibi iniunctum suscipere recusaret.

Nam causa, qua dei ira adversus populum Israelitarum sive singulos Israelitas moveri traditur, per omnia V. Ti. testimonia eadem manet ac posita est in defectu a foedere, quacunque modo perpetrato. Notissima est regula illa Num. 15, 27—31 proposita, si quis per imprudentiam sive errorem dei legem quandam transgressus sit, cum certo quodam sacrificio peccati remissionem impetrare posse; si quis vero quasi sublata in foedus divinum manu scelus commiserit, eum ex gente Israelitica extirpatum iri. Illustratur haec regula narratione continuo adiecta, viro, qui diem sabbati colligendis lignis profanaverat, ex dei mandato lapidibus necem illatum esse, quia hoc delicto foedus inter deum populumque sanctum violatum erat. Quin igitur ira dei ad eiusmodi scelera referri solet, facile intelligitur, cum praesertim moveri et quod populus in deserto fidem providentiae divinae palam pernegavit, et quod alios deos deinceps colere est conatus, et quod contenta in deum spe subsidia aliarum gentium requirere solitus est, quorum omnium conspectum ex V. Ti. libris concinnare nos piget. Sed operae pretium est, ea alia enumerare, quae tanquam aequalia talibus sceleribus vindictae irae divinae excitavisse in

V. To. traduntur. In iis eminent delicta, quibus ordo cultus a deo instituti dirumpi videtur, si quis ad deum vel habitationem dei accedere ausus est, ea potestate non praeditus (Num. 8, 19; 16, 1—3; Lev. 10, 1), inprimis si quis laicum arcam foederis manu attigit (2 Sam. 6, 7). Addimus, irae dei minas contra eum iactari, qui omiserit vectigal illud pensare, secundum quod deus cuiusque Israelitae remissus, i. e. ut socium foederis eum agnoscere voluit (Exod. 30, 12—16)*). Praeterea irae dei obnoxium sese facit, si quis res deo proprias sibi sumpsit (Ios. 7, 1), vel dignitatem populi deo proprii censu more aliarum nationum habito profanavit (1 Chron. 27, 24); tunc si quis iusiurandum per deum factum violavit (Ios. 9, 20), vel divino oraculo fidem debitam abnegare visus est (Iud. 6, 39), vel prophetae, nuntios voluntatis divinae, irrisit ac contempsit (2 Chron. 36, 16). Id denique tanquam defectus a foedere divino aestimatur, si quis viduas et orbos suppressit (Exod. 22, 22—24), vel inimicis dei subsidium praestitit (2 Chron. 19, 2). Singularem modo commemoratur, iram dei in Israelitas effusam esse, quum Moabitas adeo oppugnarent, ut rex eorum sacrificio lilio haereditario auxilium decorum suorum acquirere studeret (2 Reg. 3, 27), quasi hoc facinus in culpam Israelitarum nimis graviter eum prementium verteretur. Ex his, quae demonstravimus, poterit tandem iudicari, quid iram divinam adversus Mozen (Exod. 4, 24), tunc vero etiam adversus Aharonem et Mariam (Num. 12, 1—9) excitaverit. Quum enim Mozes mandatum dei exsequi recusaret, Aharon et Maria autem officium fratri iniunctum acmularentur, sese opposuerunt voluntati consilioque dei foedus cum populo initum stabilientis et excolentis.

Si quid vero superest ad suppleendam hanc nostram opinionem, non deerit nobis animum advertentibus eo, quod iram dei etiam ad alias nationes Israelitis inimicas ea ratione converti prophetae potissimum testantur, quia consilio divino ad populum electum pertinenti contumaciter adversati sint. Quia non opus erit, ut singula quaeque haec de re testimonia psalmistarum et prophetarum recensamus, praecipuas tantum rationes commemorabimus, quibus deus, ut iram in alias nationes conferret, movebatur. Id vero evenit iis, qui id, quod deo proprium est, sibi rapuerunt, i. e. qui Israelitas suae potestati subiecerunt, (Ier. 50, 11, 17; Ezech. 36, 5), qui expugnando populo a deo electo contra deum ipsum tanquam ipsius inimici egerunt (Ier. 46, 10; 48, 26; 50, 24), vel obedientiam deo debitam abiecerunt (Mich. 5, 14), qui tandem ex malis, quae Israelitis acciderant, voluntatem ceperunt (Ezech. 25, 26). Ab altera parte deus, quum ira sua potentiam aliarum nationum frangat, populo suo auxilium ferre videtur (Habac. 3, 12, 13). Ea enim ratione praesertim Ezechiel oraculis admirandis demonstrat deum efficere, ut ab aliis nationibus cognoscatur, quis sit, nempe omnium rerum ac nationum dominus idemque patronus populi a se electi.

Prophetarum ope omnino factum est, ut imago irae divinae, antea latebris historiae unius populi quasi occultata, in conspectum omnium eveleretur, ita ut, quum ad sortes omnium nationum illustrandas adhiberetur, simul historiae totius generis humani secundum dei providentiam per-

* Perperam hanc legem multi ita interpretantur (inter eos e. g. Oehlerus in art. *Opfercultus des d. T.* apud Herzogum, *Realencyclopädie* Tom. X. p. 630), quasi vectigal illud, מַעַד primitus ad advertendam a populo dei iram mandatum sit, indeque colligunt talia, quibus falsam quandam explicationem sacrificiorum legitimorum adjuvare posse sibi videntur. Mirum saltem in modum tenorem verborum non considerantes non vident, proximum finem illius institutionis v. 16. significat: illud vectigal, quasi obtegens et repraesentans animas Israelitarum coram deo valore ad servandam iis memoriam domini (זִכְרוֹן יְיָ); v. 12 autem non nisi finis remotior illius praestationis indicatur: ne plaga Israelitis infligatur; haec vero admonitio id tantum declarat, vectigal illud inter principalia foederis firmati documenta censer.

spiciendae regulam summam ostenderet. Scriptores quidem historiae populi a deo electi non solum id egerunt, ut irae dei renovatae deinceps et nonnunquam sedatae memoriam traderent, sed etiam, ut consilia dei de ira populo inferenda, quotcumque fuerunt, libris suis insererent. Quae si recte consideras, non potuerunt libros illos componere nisi instructi ingenio prophético. Sed qui inter scriptores V. Ti. sensu acutiore prophetae appellantur, quibus munus iniunctum erat, dei mandata, admonitiones, minas, consolationes populi erroribus, sceleribus, poenitentiae ita accommodare, ut summum dei consilium huic populo sanctum conservaretur et expeditur, — hi omnes spiritus dei instructi vel, si uavis, secuti necessitatem quandam revelationi dei usitam, ad comprehendendos fines dei altiores latiusque patentis mentes extulerunt. Pronunciaverunt ergo iudicium dei non solum de populo electo, sed etiam de aliis nationibus exercendum, in quo ira dei omnes Israelitas foedere divino indignos, nec non omnes homines sceleratos deoque inimicos extirpatura esset, ut novum foedus cum reliquis sociis populi Hebraeorum iungi, ceteraeque nationes eo recipi possent. Brevibus his verbis repraesentavimus conspectum spei prophetarum, quam per compluria secula singulati mente conceptam, sensimque exeuntam, neque ab omnibus aequali modo expressam, neque tandem a quavis obscuritate exeantem esse non ignoramus. Tantum vero fecit haec futurarum rerum universarum illustratio per prophetas declarata, ut irae dei adversus Israelitas olim tam saepe repetitae finis ultimus in devorandis omnibus dei adversariis poneretur, ultra quem ei locus amplius non concedebatur. In hanc sententiam accedunt complures prophetae, dico Iochem, Iesaiam, Ieremiam, Zephania, Obadiam, diem irae, sive diem domini statuente, quem quidem posterius quique procrastinabant; canque expectationem etiam auctor libri Danielis praedictioni, quam efformavit, rerum omnium futurarum inseruit (8, 19).

Quum igitur iram dei violato quocumque modo foedere cum populo electo moveri, omnes religionis Hebraicae testes unanimi consensu declarent, non potest dubitari, quin affectus ille a sanctitate dei originem traxerit. Sanctum deum esse omnia V. Ti. documenta principalia proclamant, non eo sensu, ut cognoscatur, dei voluntatem perfecte convenire cum eius essentia, ut Thonasio (*l. c. p.* 137) videtur, — sed sola ratione eius rei habita, quod verus et unicus deus gentem Hebraeorum tanquam propriam sibi acquisitam habeat. Ideo sanctitas non praedicatur de deo praeter alia attributa eius essentiae, sed significat verum et omnipotentem deum, quatenus societate speciali cum populo a se electo coniunctus est *). Sicut ergo deus sanctus est, quatenus universam vitam populi electi condit et ad certum finem dirigit, ita sanctitatem exserit etiam perimendis tum iis ex illa gente oriundis, qui a foedere deficiunt, tum iis alienigenis, qui populum deo sociatum ideoque ipsum deum damno afficiunt. Itaque ira definitur affectus dei sancti peremptorius contra infideles foederi vel eius adversarios. Quam rem ita esse, probatur etiam expressis verbis Iosuae (Ios. 24, 19), et dicto Iesiae 5, 16. Quod vero attinet ad iram divinam nationibus alienis indictam, monemus, Ezechielem oraculis, quae a cap. 24 usque ad cap. 38 libri ab eo editi leguntur, iram identidem eo referre, ut nationes agnoscant, deum Iehovam esse, i. e. deum omnipotentem proprie deum gentis Hebraeorum sanctum esse, qui nationibus ipsis profligandis sese sanctum praestet (28, 22; 38, 16, 23). Qua ratione etiam intelligitur rectus, quam ex incultiore Hebraeorum ingenio, affectum irae deo aeterno, iusto et omnipotenti tribui, quatenus revelans Israelitis voluntatem suam finem quandam particularem sibi proposuerit, eique persequendo incubuerit. Intra hoc revelationis imperfectae spatium non potuit igitur fieri, quin deus speciem studii cuiusdam partium assumpserit, cuius documentum per V. T. saltem in ira ei adscripta

*) Confer doctam et acutam commentationem Ludovici Diestelii, collegae amiceissimi, *Die Heiligkeit Gottes*, in *Jahrbücher für deutsche Theologie*. Tom. IV. 1859. l. p. 23.

exstat. Ad iustitiam vero dei ira in V. To. non revocatur, nisi quatenus deficientibus a foedere divino Israelitis interitum vel detrimentum parat (Is. 5, 16). Nam ius suum deus soli huic populo statuerat, ceteras vero nationes in eius communionem nondum receperat. Itaque vindictam quidem inimicis dei extraneis, iustam vero retributionem sociis infidelibus et obedientiam contumaciter denegantibus per iram dei effici lex et prophetae saepenumero testantur.

Quae quum ita sint, videtur a notione irae divinae antea explicata plane abhorreere, quod pii quoque Israelitae in Psalmis libroque Iob (confer etiam Ier. 10, 24; Thren. 3, 1 seqq.) saepenumero de variis malis et calamitatibus per iram dei sibi illatis queruntur. Quod sicut cum normis, quae in V. To. nunc invenimus, convenire non videtur, ita ne illo quidem decreto theologiae illustrari potest, iram dei cum peccato haereditario coniunctam esse, eamque ob rem a piis illis poetis sentiri. Nam quatenus pii sunt, secundum ipsam veterem illam theologiae formam inter Christi quantumvis denum futuri fideles sunt censendi, ob eamque rem a culpa peccati haereditarii liberi et ab experienda dei ira exempti. Sed res hac ratione expeditur. Nota est omnibus quaestio illa ab hominibus religioni V. Ti. summa pietate addictis multum pensitata, qua causa piis fortuna adversa, impiis secunda tam saepe acciderit. Quum igitur pii huius divinae dispositionis rationes ad liquidum perducere, et cum lege iustitiae divinae componere conarentur, id ipsum perspectae nondum ab illis dei providentiae indicium est, quod calamitates suas, quantumvis vehementes et continuas easque comparatas tum fortunae impiorum tum suae fidei et obedientiae, ab ira divina in se descendere coniectarunt. Nam in religione denum christiana patet regula, secundum quam illa quaestio recte diiudicatur, cuius dimidiam partem iam Salomo, proverbiorum auctor, attingit (Prov. 3, 11, 12). Calamitates enim piorum non irae, sed castigationis paternae argumenta sunt (Rom. 8, 28; Hebr. 12, 5—11), fortuna vero impiorum secunda ad confirmandos eos in malitia eosque perdendos valet. Quod ergo in V. To. pii iram dei deplorant, non pertinet ad definiendam eius notionem, quam nos N. Ti. interpretandi causa quaerere instituimus.

Quem finem ut assequamur, simulque ea, quae iam exposuimus, confirmemus, eo nunc animum advertere placet, quam rationem inter iram ac misericordiam dei intercedere V. Ti. scriptores prodant. Hanc vero voluntatis sive affectus dei vicissitudinem in eo tantum modo observari licet, quo cum Israelitis agit, quoniam prophetae, quando iram dei ceteris nationibus comminantur, minime eo prospiciunt, ut eadem in novum dei foedus recipiantur, et quando in hunc finem animos intendunt, irati dei iudicia illis imminencia plane praeternunt. Quodsi in V. To. ira et misericordia dei inter se comparantur, haec res nullatenus adhibetur ad omnium gentium sive totius generis humani sortem a deo definiendam, sed in populi electi tantum fortunis explicandis continetur. Revocamus igitur in memoriam, iram dei in V. To. semper ita defini, ut in certis effectibus cernatur, non autem ut pro continua voluntate dei habeatur, quae etiam a certis effectibus abstinere possit. Ira dei igitur, quae nisi in effectu quodam vel saltem in consilio divinitus declarato non ostenditur, certis temporis finibus circumscribatur necesse est. Itaque prophetae, quando irae divinae effectus annuntiant, saepenumero adiungunt spem, fore ut ira cesset, et misericordia dei eam sequatur (e.g. Is. 12, 1; Ier. 32, 36—42; Hos. 11, 8, 9; Amos 7, 3, 6; Mich. 7, 9; Ps. 85, 2—8). Neque vero fortuito talis expectatio prophetis in mentem venit. Ratio enim, qua moventur, ut affectus dei illos permittari confidant, aliis locis V. Ti. pernuclis iisdemque maxime conspicuis satis illustratur. Nam iracundum deum in V. To. manifestari, Marcio temere finxit; sed foedus sancti dei cum populo a se electo conditum esse et servari eius gratia, auxilio, misericordia, tolerantia, omnes illius religionis vindices uno ore proclamant. Non ergo deum sanctum iracundum esse V. Ti. scriptores testantur; sed e contrario, quod deus iram differat, tanquam principalem eius virtutem

esse idem profitentur (Exod. 34, 6; Num. 14, 18; Ps. 86, 15; 103, 8; 145, 8; Ioc. 2, 13; Nah. 1, 3; Iona 4, 2; Nehem. 9, 17). Deus propter nomen suum, i. e. propterea quod sanctus Israelis est, ab ira exserenda se abstinere mavult (Ies. 48, 9). Sanctitati eius inusitum est, quod in ira non perseverat, sed quod ira eius per gratiam et misericordiam erga Israelitas superatur (Hos. 11, 8, 9; Mich. 7, 18; Ps. 30, 6; 78, 38). Itaque ad gratiam deo sollemnem (Ies. 60, 10; Thren. 3, 31, 32; Iou. 4, 2; Dan. 9, 16) vel ad fidem eius populo electo servandam (Ies. 51, 22; 52, 6) provocant prophetae, quando rationem irae sedandae indicant. Cui rei optime congruit, quod simul postulant, ut populus ira percussus ad obedientiam deo exhibendam se revertat, qua demum conditione expleta deus gratiam suam denuo in Israelitas conferre possit (e. g. Ies. 10, 21, 25; 26, 20; 27, 5; Ier. 18, 8; Ion. 3, 9, 10; Zach. 1, 2, 3; 2 Chron. 12, 7, 12; 1 Reg. 8, 46—50). Eamque ob causam gratia dei et conversio populi coniunguntur (Ioc. 2, 13, 14; 2 Chron. 30, 8, 9). In libris V. Ti. historicis exstant praeterea narrationes quaedam, quibus effici videtur, sacrificia etiam et oblationes ad placandam iram movendamque gratiam dei adhibita esse. Quam rem nunc eo libentius tractamus, quo graviores inde errores quibusdam theologis nostra sententia sunt oborti.

Optime monuit Hofmannus Erlangensis (*Schriftbeweis* Tom. 2. p. 227) vocem *יָדָוּעַתָּהּ* neque in V. neque in N. To. de efficacia sacrificiorum eo modo usurpari, quo secundum etymologiam Graecis sollemnis est, ut placari deum per sacrificium significet. Substitutum est a LXX interpretibus voci plane alio sensu instructae, *זָבַח*, quae per totum legis Mosaicae codicem eo refertur, ut quodvis sacrificium legitime mandatum vel praescriptum ad obtegendum oblatorem vel obtegendas animas oblatorum coram deo valeat, unde ne vox *יָדָוּעַתָּהּ* quidem in graeco biblicorum textu ad aliud obiectum applicatur. Quae res tam manifesta est, ut e. g. Delitzschius quoque non audeat in dubium vocare, legislationem Mosis sacrificia deo placando adhibenda neque statimere neque agnoscere (*Commentar zum Briefe an die Hebräer* p. 94 seqq.). Ne vero, hoc concessio, doctrina de ira divina per Christi sacrificium placata infringi, vel saltem fundamento scripturae privari videatur, praesidium huic opinioni inde parare studet, quod quibusdam V. Ti. locis sacrificia dei iram placantia commemorantur. Quae tamen res recte excessa omnino ad explodendam illam opinionem nos ducet. Quum Israelitae cultu vituli avari sese inquinavissent, eaque re iram dei de foedere violato excitassent, quam deus consilio eorum perimendorum declaravit, Moses deprecationem pro suis interponere conatus est, quam intercessionem, commemoratione patriarcharum firmatam, deus approbavit, ita ut consilii illius eum poeniteret (Exod. 32, 7—14). Quum populus de Korachitis perentis indignaretur, deusque iratus inopinate pestem immitteret, deus iram eo sedari passus est, quod Aharon ex mandato Mosis suffimenta deo obtulit (Num. 17, 6—15). Quum propter census populi a rege Davide institutum pestem populo deus inmisisset, ira dei per sacrificia holocausta et eucharistica placata est (2 Sam. 24). Eodem fere sensu praescribit deus in libro Iob, ut amici Iobi per holocausta intercessioni Iobi adiungenda iram averterent, cuius periculum facere ipsi sermonibus iniuriis adversus deum plenis meruissent (Iob 42, 7—9). Videtur ergo deus sanctus his saltem exemplis deos aliarum nationum eo imitari, quod iram suam donis quibusdam sedari concessit. Sed plane aliter res se habet, modo accuratius eam consideres. Effectus sacrificiorum Davidis declarat huiusmodi verbis *וַיִּסְרֹף יְהוָה בְּאֵשׁ וּבְחֵלֶב יְהוָה וּבְחֵלֶב אֵשׁ* orationibus terrae cessit. Ab amicis Iobi postulantur oblationes eam ob causam, ut supplicant deprecationem a Iobo exercendam, cuius potissimum ratione habita gratia dei eis denuo concessa esse dicitur. Sed etiam incensio turis ab Aharon peracta convenit cum simplici oratione (Ps. 141, 2), qualem Moses prope montem Sinai deo obtulit. Oratio autem secundum religionem V. Ti. est appellatio nominis dei, i. e. dei, qualem in condendo

et servando foedere cum Abrahamo eiusque prole se exhibet. Significat ergo oratio agnitionem sollemnem dei per foedus ietum huic populo consociati. Itaque Moses defectum populi primum in deserto perpetratum deprecatur, foedus cum patriarchis initum in memoriam dei revocat, fideique dei illis promissae recordationem facit, ut eum denuo populo inobedienti reconciliet (Exod. 32, 13). Ex his sequitur, ut intercessionem, quas recensuimus, ad sedandam dei iram eam ob causam valeant, quia foedus a populo violatum ab eius parte redintegratur, adhibitis in eum finem sollemnibus eis, quibus populi duces legitimi pro eo coram deo agere potuerunt. Quam rem clare et sufficienter confirmat locus 2 Chron. 29, 8—11. Narratur enim ibi, Hiskiam regem consilium foederis cum deo Israelis renovandi cepisse, ut iram a se et populo universo averteret, inque hinc finem a sacerdotibus et Levitis postulasse, ut, templo ab omni idololatriae apparatu purgato, deo suffimenta offerrent. Itaque his quoque narrationibus recte perspectis non alia ratio sedandae dei irae commendatur, quam quae a prophetis indicata est, ut populus ab inobedientia reversus foedus denuo instaurare debeat. Hoc solum discrimen observari licet, quod filii historici duces populi hanc rem per actus symbolicos pro eo egisse exhibent, prophetarum vero mandata ad uniuscuiusque animum moresque foederi divino revera conformandos spectant. Minime vero conatus illos foederis renovandi adhiberi licet ad sacrificium Christi illustrandum. Nam hoc sacrificiis pro peccatis in lege Mosaica institutis exaequatur; nunquam vero narratur, ad avertendam iram divinam sacrificia talia peracta, sed tantum holocausta et eucharistica sive suffimenta deo oblata esse. Hoc vero discrimen satis luculentum est, quod theologi scripturae sacrae studiosi, neque dediti opinionibus quantumvis in hominum consuetudine inveteratis, non debent praetermittere. Quaecumque enim divinae irae sedandae causa praestantur, in iis periculum quoddam fit, effectu certo nondum prospecto, ita ut deus e.g. secundam Mosis deprecationem pro populo oblatam non acceptaret (Exod. 32, 31—35); sed sacrificiis pro peccatis secundum legem peractis remissio peccatorum expetita per certam dei promissionem adiuncta est. Nam negotia illa intercessionis suscipiuntur, quum foedus laesum, ideoque gratia dei populo incerta sit; oblatio vero sacrificiorum legitimum pro peccatis summa certitudine gratiae divinae foedere firmata nititur. Itaque, quum apostoli vim mortis Christi secundum legem de sacrificio anno pro totius populi peccatis offerendo explicarent, minime potuerunt ponere, gratiam dei hac demum oblatione populo dei vel toti hominum generi expetendam esse; sed e contrario indicaverunt hac ipsa sententia, gratiam dei nulla ira perturbati totum opus Christi instruxisse. Omnia enim peccata, ad quae remittenda sacrificium Christi tanquam consummationem sacrificiorum pro peccatis annorum valere perhibetur, hac re ipsa ita aestimantur, ac si omnia hominis errore et imprudentia commissa sint. Quodsi peccata, ad quae delenda sacrificium Christi refertur, talem speciem prae se ferunt, non potest fieri, ut iram dei ad ea vel ad Christi sacrificium ipsum pertinere ullo modo apostoli agnoscaut, si modo credimus, eos legem Mosaicam recte intellexisse.

Iram dei ex V. To. illustratam summo opere a notione odii diversam esse, nobis videmur recte docuisse. Sed ne eo quidem, quod interdum deus aliquid odisse praedicatur, talia colligenda sunt, quae sententiae de ira dei divulgatae praesidium afferre possint. Odit (אָד) deus apparatus idololatriae ab Israelitis institutae (Deut. 12, 31; 16, 22; Ier. 44, 4), superbiam eorum, qui vitae luxuriosae dediti sunt (Am. 6, 8), rapinas secleratas (Ier. 61, 8), dimissiones uxorum arbitrarias (Mal. 2, 16), malitiam et peritium (Zach. 8, 17), sollemnia a populo inobediente peracta (Ier. 1, 14; Am. 5, 21). Item testantur prophetae odium dei adversus facinorosos et mendaces (Ps. 5, 6. 7; 11, 5), adversus Esau (Mal. 1, 3), Ephraim (Ilos. 9, 15), imo populum deo proprium (Ier. 12, 8; Ps. 106, 40). Intelligitur tamen, etiam hunc affectum ad singularem quaeque referri neque haec effata sic accipi posse, quasi religioni Hebraeorum dogma aliquod

de odio dei adversus genus hominum universum implicitum peccatis sit insitum. Contraria potius sententia universae foederis divini historiae est supposita, quoniam consilium tolerandi generis humani commemoratur eam ob causam, quia homines a juventute in mala proclives, debilesque voluntate sint (Gen. 8, 21; confer Ps. 78, 38, 39). Minime saltem in N. To. odii dei adversus peccatores ratio ulla habetur, praeterquam quod effatum Malachiae de Esau deo peroso a Paulo laudatur (Rom. 9, 13).

Itaque investigaturi nunc, qua ratione ἡ ὀργὴ τοῦ Θεοῦ in libris N. Ti. describatur, ei regulae explicationes nostras subiiciamus, quod eandem notionem irae divinae animis Christi et apostolorum inesse oportet, quae in V. To. statuitur, nisi certis et indubitatis iudiciis diversitas probatur. Ipse nexus inter utrumque librorum sacrorum codicem conspicuus interpreti N. Ti. officium iniungit, ut ad explicanda verba apostolorum vel domini ipsius adhibeat sententias, in V. To. iisdem verbis expressas, neque ab hac norma recedat, nisi ubi ea adhibita ineptias N. To. obtrudere cogatur. Copulatur vero N. T. cum Vetere ea potissimum re, quod praedictionem iudicii divini a prophetis exortam a Christo tum expletam esse, tum expletum iri testatur. Nam si Christum regni dei inter homines condendi nuntium et auctorem existuisse intelligit, quicumque N. Ti. vel leviter gnarus est, accuratius inquirenti sermones domini ac comparanti eos cum prophetis V. Ti. non potest dubium esse, quin hoc officium in eo nitatur, quod Christus, etiam divina potestate iudicii de omnibus hominibus instituendi ornatus, hoc ipsum ita exsecutus est, ut alteros fide in se ipsum instructos deo conciliaret, alterorum vero fidem sibi denegantium inimicitiam adversus deum confirmaret (Ioh. 5, 22, 24, 27; 3, 18—21; Matth. 10, 34—39). Quum vero haec ratio iudicii non satisfaceret vocibus prophetarum, externam hominum separationem praedicentium, hoc negotium a Christo et apostolis ad ulterius temporis momentum est dilatum. Ad hunc finem rerum omnium retulerunt igitur singula quaeque, quibus prophetae expectationes suas de iudicio futuro descriperant et exornaverant; neque praetermiserunt eam ob rem, etiam annunciationem irae divinae adversus inobedientes et sceleratos exserendae renovare. Haec res perspicue repraesentatur talibus effatis, quae iram divinam expressis verbis temporis futuro vindicant. Eo pertinet, quod Ioannes baptista conversionem animi commendat, qua quis fugere possit ἀπὸ τῆς μέλλουσας ὀργῆς (Matth. 3, 7; Luc. 3, 7); quod dominus de gente Israelitarum pronunciat: ἵσταί ἀντίπαρ μέγαλη ἐν τῇ γῇ; καὶ ὀργὴ τῆ λαοῦ τούτου (Luc. 21, 23); quod Paulus proficitur, tum Christum suam ecclesiam servare ἀπὸ τῆς ὀργῆς τῆς ἐρχομένης (1 Thess. 1, 10), tum iram dei ἐρχομένη ἐν τοῖς ἡμέτεροις τῆς ἀντιπαθείας (Eph. 5, 6; Col. 3, 6). Prophetarum expectationi consensum praeterea id est, quod etiam apostoli sistant ἡμέτεροι ὀργῆς, tanquam ultimam finem per iudicium divinum historiae hominum imponendum (Rom. 2, 5, 8; Hebr. 10, 25, 27; Apoc. 6, 16, 17). Ad quem diem spectant omnia, quae praeterea Ioannes in apocalypsi de ira divina, exemplis prophetarum (Jer. 25, 15; Is. 51, 17, 22) usus, commemorat (11, 18; 14, 10; 16, 19; 19, 15). Denique de ira a Daniele (9, 26) ad finem temporis dilata disserit Paulus, ubi miserum statum rerum pulcrarum Iudaicarum ex ira finali, quae iam tunc efficax esse coeperit, deducit (1 Thess. 2, 16). His praemissis necessarium est, iram, a qua servatum iri iustificatos per Christum Paulus contendit (Rom. 5, 9; confer 1 Thess. 1, 10), ad ultimum iudicium referri. Deinde vero consentaneum videtur, ut loci Paulini 1 Thess. 5, 9; Rom. 3, 5; 4, 15; 9, 22 eodem modo intelligantur. Nam quum σωτηρία, quae irae dei 1 Thess. 5, 9 opponitur, unanimi apostolorum consensu ita intelligatur, ut fidelibus die denuo iudicii suppedietur, sequitur, ut etiam ira, illo loco commemorata, a Paulo ad ultimum rerum humanarum finem delegetur. Rom. 3, 5 deus appellatur ὁ ἐπιφέρων τὴν ὀργήν, haec vero verba versu sequenti aperte referuntur ad expectationem iudicii futuri. Rom. 9, 22 explicantur σκεπτή ὀργῆς

per *κατηγορήματα* et *ἀποκρίται*. Nisi autem iam hac definitione sensus irae eschatologicus elucet, necessarium enim esse ideo probamus, quod idem versus eosdem Iudaeos a deo summa tolerantia tractari significat. Quum autem fieri non possit, ut deus eodem temporis momento cum iisdem toleranter agat iisdemque irascatur, opus est, ut ira, cuius exserendae deus consilium cepisse, et quae imminere ipsis dicitur, quos patienter toleravit, ad ultimum diem referatur. Itaque etiam loco Rom. 4, 15: *ὁ νόμος ὁμολογῇ κατηγορεῖσθαι*, eadem interpretatio vocis *ὁμολογῇ* apta erit. Quum enim lex dicatur efficere transgressiones, his vero ultimum dei iudicium destinatum sit, ira hic memorata eo referenda esse videtur. Itaque in omnibus his N. Ti. locis, quos recensimus, ira dei non repraesentatur nisi ita, ut effectus hominum perimendorum sive τῶ ἀποκρίῳ tradendorum cum affectu animi divini coniungatur.

Sed quaeritur, an haec sententia V. Ti. usul adaptata etiam in reliquis tribus N. Ti. locis expressa sit. Inter ea primum ad Rom. 1, 18 animum advertimus, ubi verba: *ἀποκαλύπτεται γὰρ ὁργὴ θεοῦ ἀπ' οὐρανοῦ ἐν πᾶσι ἀείψεται καὶ ἀδικία ἀρδύωνται τῶν τῆς ἀλήθειας ἐν ἀδικίᾳ κατήχοντων* — continent rationem cognoscendi, secundum quam in evangelio via divina ad salutem Iudaeis et paganiis parandam manifestatur. Nisi enim illa efficacia dei salutaris omnibus hominibus in evangelio praeberetur, relinquenter irae divinae. Divulgata vero est apud interpretes epistolae Paulinae ea sententia. Paulum eam, quam penit, manifestationem irae dei postea accuratius describere in vv. 24. 26. 28. Unde colligunt hanc opinionem apostoli esse, iram adversus paganos, quam deus propter scelus idololatriae conceperit, deinceps eo patefactam esse, quod deus ad graviora facinora illos induxerit. Sunt autem, qui iram dei etiam hoc loco de iudicio extremo expliant. Qui etsi nexum orationis Paulinae non satis expediverunt, tamen ad iis assentiendum eo quodammodo incitantur, quod ira dei, ubicunque in epistola ad Romanos de ea sermo fit, ad finem omnium rerum trahitur. Quod quidem hic quoque non solum posse fieri, remota ea difficultate demonstrandum est, quae ex adhibita a Paulo praesentis forma *ἀποκαλύπτεται* oriri videtur, sed tota oratione accurate observata diiudicari debet, utrum hic sensus verbis Paulinis cum necessitate tribuatur necne. Cui rei expediendae egregium adiuumentum paravit recentissimus epistolae interpres, Schottius Erlangensis (*Der Römerbrief seinem Endzweck und Gedankengang nach ausgelegt*, 1858). Primum enim rectissime monuit, totam orationem inde a v. 19. non eo valere, ut probetur, cur dei ira in homines sceleratos et iniustos effundatur, — sicut praeter alios c. g. Meyerus statuit, — sed eo, ut illustretur, quomodo homines i. e. pagani τῆς ἀλήθειας ἐν ἀδικίᾳ κατήχονται. Tum eo bene meruit, quod eorum sententiam refutavit, qui in cap. 2. Paulum non amplius de paganiis, sed de Iudaeis disserere putarunt. E contrario Schottius orationem Paulinam ita institutam esse contendit, ut de iisdem in cap. 2. verba facere apostolus pergeret, quorum antea rationem habuit. Paulus igitur exordium facit a ratione, qua homines, patefacta excelsa dei potentia, veritatem quandam divinarum rerum cognoverint (1, 19. 20); tum exponit, eos veritatem de deo mentibus conceptam idololatria corripuisse (v. 21—23); deinde vero addit, deum eos in graviora scelera tradidisse, et omnino animi eorum perversum firmavisse (v. 24—32), ut demonstretur, paganos a defectu commisso non, utinque vellent, reverti potuisse; finem denique orationi ita imponit, ut doceat, ne conscientia quidem morali, secundum quam nonnulli culpam aliorum cognoverint, eos a statu omnium separari (2, 1—4), sed hos ipsos sceleribus universorum addictos, neque rationi convertendae vitae studentes, iram iudicio extremo coniunctam expertum iri (v. 5—8). Ergo quum tota Pauli oratio de veritate a paganiis impedita hoc modo cohaereat, veremur, ne Schottius in sua interpretatione non constituerit, quin ipse (*l. c. p.* 143) scelera a deo cumolata ab ira divina sese manifestante derivaret; iudicamus potius, poenas illas divinas ideo commemorari, ut firmitas et immo-

bilitas erroris paganorum probetur. Deinde vero non possumus quin contendamus, vv. 5—8 in cap. 2. ita ad cap. 1, 18 respicere, ut finis orationis ad initium reveratur. Hac autem re tanquam necessariam confirmatur, iram dei his duobus locis non diverso sensu praedicari, sed utroque loco ad imaginem iudicii extremi referri. Itaque servatur hoc quoque loco ea ratio irae per totum V. T. observata, ut non absque effectu peremptorio deo tribuatur. Nam Paulus etiam expectat, iram omnibus paganis illatum iri, nisi evangelio sese converti patiantur. Tantum vero abest, ut odium dei sive iracundiam continuam paganis obverti statuat, ut potius copias tolerantiae et patientiae divinae paganis manifestatas testetur (Rom. 2, 4). Tolerantia enim et iracundia ad eodem eodem temporis momento valere non possunt. Addimus, Paulum etiam in hac re cum V. To. facere, quod iram dei non ad quodvis peccatum hominum referri docet, sed ad ea tantum, quae a veritate per iniustitiam impedita originem traxerint. Nam secundum V. T. prophetae nationibus eam ob rem tantum iram dei comminantur, quod veritatem religioni Israelitarum insitam contempserunt et suppresserunt. Quam rationem Paulus latioribus finibus circumscripsit, quum statueret, deum praeter foedus cum Israelitis conditum ceteris quoque nationibus quaedam veritatis de se cognoscendae vestigia proposuisse, easque iam eo, quod omnes idololatriae incumbentes veram potentiam et excelsum dei sibi manifestam in contraria vertissent, iram dei finale mernisse. Quam ob causam hanc iram non ut prophetae sanctitati dei vindicavit, sed ad universalem eius iustitiam revocavit (*δικαιοκρασία* Rom. 2, 5).

Pergimus ad considerandum locum Eph. 2, 3: *καὶ ἡμεῖς* (sc. Iudaei) *τέκνα ᾧ ὄργῃ; ὡς οἱ λοιποὶ* (sc. pagani). Interpretatio horum verborum versabitur in solvenda ea questione, utrum Paulus novum aliquid descriptioni peccatorum actualium antea datae adiungat, an hanc ipsam descriptionem ad finem modo perducatur. Itaque aut cum Harlessio statuemus, Paulum his verbis statum peccati originalis significare, aut assentimur Meyero contendenti, Paulum non nisi adumbrationem vitae hominum perverse antea inchoatam consummare. Praemittimus ergo cum Harlessio, vocem *ᾧ ὄργῃ* respicere ad aliquam *θείαν*, secundum quam Iudaei aliud quid esse videntur, quam filii irae; hanc rem autem non posse intelligi, antequam *τέκνα ὄργῃ* explicatum sit. Non dubitamus cum eodem, quum haec formula ex usu loquendi Hebraeorum descendens propriam certorum hominum qualitatem significet, ita ut verba, de quibus agimus, Iudaeos non solum esse dignos ira divina, sed obnoxios irae, destinatos ad iram experiendam indicent. Quum vero in irae dei notionem libris sacris sollemnem neque Harlessius neque alius horum verborum interpretes accuratius inquisiverit, nobis saltem ius concedetur, ut, quae in scriptura sacra de ira divina invenimus, huic loco explicando adhibeamus. Est igitur periculum faciendum, annon notio irae futurae, quam ubique Paulus proclamat, etiam his verbis apta sit. Neque cedimus hac in re Harlessio praetendenti, formulam, de qua agitur, non spectare ad futurum aliquid, sed qualitatem praesentem quandam repraesentare. Nam haec opinio facile refellitur. Non solum dicitur *ἰδὸς ἀπειθείας, ἰδὸς εἰρήνης, τέκνα ᾧ ὄργῃ, τέκνα κατὰς*, sed etiam *ἰδὸς ἀπολείας* (Ioh. 17, 12), *ἰδοὶ ἀπολείας* (2 Petr. 2, 14), *ἰδὸς γέννη;* (Matth. 23, 15). His sane exemplis probatur, non non leviter agere, quum *τέκνα ὄργῃ* veritatem destinatos irae dei futurae. Deinde Harlessius recte monuit, voci *ᾧ ὄργῃ* respondere eam *θείαν*, quod Israelitiae propter societatem foederis divini contraria qualitate ornatam esse videntur: *τέκνα ᾧ ὄργῃ ἐπαγγελίας*. Ea vero re ipse refellit suam opinionem veteri doctrinae adstipulantem, *ᾧ ὄργῃ* a Paulo commemoratam referri debere ad peccatum Israelitis ceterisque hominibus innatum. Nam si secundum promissionem a deo datam in gratiam dei recepti esse videntur, ira dei ad qualitatem eorum definiendam ita refertur, ut universo statui vitae eorum accommodetur praeter ea, quae ab electione dei in eos redundarunt. Cogitandum igitur est de peccatis actualibus, praesertim quum iram dei alii peccatorum generi officere, quam eis, a quibus

voluntas dei manifesta plena libertate violatur, in scriptura sacra non invenerimus. His rationibus permoti non possumus quin iudicemus, verba Pauli nunc explicata praemissae descriptionis peccatorum actualium summam complecti. Iudaei, quales, praetermissa dignitate per foedus divinum eis iniuncta, ex sola ratione transgressionum foederis deinceps repetitarum aestuandi sunt, obnoxii sunt irae dei futurae, sicut omnes pagani, nisi per Christum demum in gratiam divinam recipiunt. Neque tandem iustum est, comparatis aliis Pauli sententiis vulgarem doctrinam, secundum quam iam peccato originali ira dei obverti traditur, apostolo imputare. Statuit quidem, mortem tanquam statum damnationis per iudicium dei ab Adamo ad omnes homines transiisse (Rom. 5, 12. 16). Sed considerari oportet, Paulum non permittare τὴν θύρατον et τὴν ἀνοστήσαν, neque τὸ ῥῆμα εἰς κατέσχευον et τὴν ὀργήν. Nam iudicium de Adamo peccatore latum mortemque inde ad universam eius sobolem descendentem ostendit aut tolli salvandis per iudicium iustificatorium et per vitam Christi, aut firmari percuntibus, propterea quod gratiam divinam continentur (2 Cor. 2, 15. 16). Iram vero divinam nonnisi inobedientia et defectu actu commissis excitari, Paulus eum omnibus utriusque testamenti scriptoribus contendit. Quamvis autem consilium irae peccatoribus contumacibus inferendae, propter tolerantiam dei ad diem extremum dilatae, abrogari posse videatur, modo gratiae a Christo oblaetae convertendis animis sese accommodent, tamen, perditionem ab ira divina peccatoribus illis revera inflictam tolli posse, nec Paulus, nec alius quis apostolus auctor est. Nisi enim iram divinam contra sententiam universae scripturae ita intelligis, ut effectum peremptorium ab eius notione seiungas, minime poteris congrue sententiae Pauli statuere, peccatores subesse irae dei, sed id tantum, eos subiectos esse consilio divino irae in iudicio extremo iis intelligendae, nisi Christo fidem habere. Distinguit igitur Paulus inter iram et consilium irae exercedae. Cum hoc consilio dei, quatenus ad statum gentis humanae actu peccatrix refertur, coniungit Paulus et tolerantiam dei et consilium gratiae poenitentibus applicandae. Ira tamen, i. e. motus animi divini efficax ad perducos gratiae contentores, nulla ratione cum gratia sive misericordia dei copulatur.

Cuius explicationis adiumentum firmissimum praebent verba Ioannis in evangelio 3, 36: ὁ ἀντιθῶν τῇ φωνῇ οὐκ ὀφείλει ζωῆς, ἀλλ' ἔστι ὀργὴ τοῦ θεοῦ μένει ἐν αὐτῷ. At hoc effatum ab aliis in contrariam prorsus sententiam verti, non ignoramus. Ut alios taceam, Thomasius (l. c. p. 289) literis longiore intervallo positus indicat, non posse dubitari, quin aliquid non possit manere, ibi antea non fuerit; itaque sententiam horum verborum interpretans contendit, iram dei, quae fidem Christo denegantes prenat, statui peccati iis congeniti inherere. Sed si quem lectorum benevolam et studiosiorem eruditionis exegeticae, quam traditionis dogmaticae invenimus, ab eo petimus, ut consideret, consuetudinem usus dogmatici non semper convenire cum usu loquendi in libris sacris sollemnibus, nec unquam interpretem speciei verborum indulgere debere. Thomasius saltem, quum literis diductis significet, quam vim voci manendi sana cuiusque ratio vindicare soleat, dictorum quorundam Christi conspicuorum graviumque recordatus esse non videtur. Exstant enim apud Ioannem duo Christi de peccato effata insignia (9, 41; 15, 22. 24), in quorum altero vox μένει mirum in modum usurpatur, unde tamen thesis Ioannica, de qua agimus, singulariter illustratur. Edicit dominus, peccatum omnino non esse nisi in odio, quo quis sibi officio a patre sibi iniuncto resistat. Hinc igitur rei comparata omnis inobedientia contra dei voluntatem ab hominibus, antequam ipse adesset, commissi ita iudicatur, ut propriam peccati vim nondum assecuta sit. Quum ergo de Pharisaeis, summa pertinacia plenaque conscientia fidem sibi denegantibus, pronunciat: ἔτι ἡμέραν ἔμεινεν (9, 41), significat peccatum aliquod manere, quod antea adfuisse sua iudicandi ratione pernegat. Quam ob rem ne nos quidem a veritate aberrabimus, quum sententiam Ioannis de ira dei super incredulo manente eandem rationem secuti

interpretabimur. Quum enim nostra totius scripturae sacrae perlustratione id effecerimus, ut iram dei non ad quamvis legis transgressionem, sed ad contumaciam tantum, qua voluntas dei manifesta vel violatur vel oppugnatur, referri intelligatur, quum deinde Christus testetur, contumaciam peccati irae divinae obnoxii per incredulitatem demum et inobedientiam erga se consummari, sequitur, ut apostolus, qui illa domini effata servavit, congrue domini totiusque scripturae suffragis non nisi ita sentiat, ut iram dei, quae super obedientiam Christo denegante manebit, hoc delicto demum ipso moveri existimet.

Sed opus nobis est, quasdam adhuc observationes adiungere. Primum enim illa regula, secundum quam Christus ipse peccatum iudicari docet, plurimum facit ad solvendam eam quaestionem, quomodo sacrificium Christi ad remittenda omnia peccata antea commissa valeat, quoniam V. T. et populum electum et ceteras nationes peccatis talibus obrutas esse ostendit, quae iram dei moventia a remissione legitima exenta esse videntur. Haec res in N. To. non ita expeditur, ut Christus quasi reorum vicarius iram dei passus esse dicatur, sed ita, ut omnia delicta, quae secundum regulam quidem V. Ti. ira divina sunt digna, cum manifesta contra filium dei iniuncta comparata, per ignorantiam et animi levitatem commissa esse, itaque idonea aestimantur, ut legitime remittantur (confer Marc. 3, 28—30). In hac N. Ti. regula nititur, quod Paulus eosdem indulgentiam peccatorum assequi docet, quibus, nisi gratiae dei per Christum oblatae sese applicare velint, iram dei finalem comminatur. Attamen in loco, de quo egimus, Ioanneo non possumus quin notionem irae dei aliquatenus mutata esse profiteamur. Ubique enim in libris sacris ira divina commemoratur, affectui animi divini effectus externus ita adiungitur, ut experientia hominum iram dei non praeter hunc effectum assequatur. Huic autem rationi unum illud Ioannis effatum non congruit. Neque vero omni ratione indiget, quod iram Ioannes consilio irae exserendae substituit. Nam etiam iudicium divinum a Christo institutum in evangelio Ioanneo ita describitur, ut observationem hominum subterfugiat, et in latebris animorum aut fide in Christum motorum, aut iniuncta ab eo aversorum contineri existimetur. Quodsi quis Christo fidem et obedientiam denegans iamiam iudicium dei expertus esse dicitur (3, 18), consentaneum est, eum irae dei subiectum esse, quamvis nullo vitae vel fortunae detrimento, quod sub oculos caderet, afflictum. Reservatur tamen, iram dei suam vim postremo in perimendis talibus infidelibus exserere.

III.

Disquisitis testimoniis de ira dei in sacra scriptura nobis occurrentibus postremo ei officio satisfaciendum erit, ut locum notioni irae divinae in disciplina dogmatica tribuendum certis finibus circumscribamus. Neque timeamus, ne demonstratio nostra apud quosdam offensionem habeat, quum causam scripturae secundum se ipsam explicatae adversus admiratores cuiusvis traditionis theologicae agamus. Itaque primum definimus, in quibus dogmatibus efformandis ratio irae dei non habenda sit, deinde conabimur exponere, quomodo notio illa doctrinae christianae accommodari videatur.

1. Ira dei non debet referri neque ad peccatum originale, neque ad transgressionem Adami. Huius enim sententiae nullum testimonium in libris sacris exstat; praeterea vero haec sententia ea re excluditur, quod nonnisi defectus actualis a foedere divino, tunc perversio veritatis in idololatria nationum obvia, obstinatio tandem animi fidem Christo denegantis, sive peccatum in

spiritum sanctum irae divinae subiiciuntur. Ianiam notavimus, Paulum neque mortem Adami causa toti hominum generi inmissam cum perditione peccatoribus contumacibus imminente, neque iudicium damnatorum, qua illa calamitas inflictæ est, cum ira extremo iudicio adiuncta usquam vel exaequare vel misce. Itaque etiam theologus, qui gradus peccati bene distinguet, de ira dei bene et apostolo congrue docebit. In hac re tamen non possumus non admirari levitatem, qua Thomasius (*l.c. p. 348*) statuit, vel potius ornatu oratorio usus contendere videtur, iram divinam, repræsentatam gladio Cherubis audent, omnino pertinere ad excitandam in homine conscientiam culpæ *), diu simplici cuique lectori libri Mosæici patet, bonitatem dei homines querentis suamque curam illis præstipari (Gen. 3, 8. 9) iisdem conscientiam culpæ commissæ inieciisse.

Non ignoramus tamen, errorem, quem oppugnamus, non solum ita refutari, ut sententiam ei contrariam in universa scriptura exhiberi ostendatur, sed etiam ita, ut erroris origo in lucem proferatur. Neque enim nostrum, quum de quacunque veritate nobis persuasum est, aliter sentientibus errorem exprobrare, sed de errore eos convincere. Itaque non difficile est intellectu, eos, qui sicut Thomasius traditioni dogmaticæ servandæ student, eam ob rem iram dei ad notionem peccati Adami et hæreditarii trahere, quod eis accidit, ut iam primum peccatum peccato in spiritum sanctum exaequant. Cui errori præterea supplebit opinio vulgaris de primorum hominum statu omnibus numeris absoluto. Sed quomodo dicemus cum indolo primorum hominum in libro Mosæico descripta convenire decretum eiusdem Thomæ, qui primis hominibus puram perfectamque dei conscientiam, voluntatem omnino bonam, amorem dei liberis convenienter tribuit (*l.c. p. 216*)? Talis opinio, qua primus homo ad gradum vitæ christianæ evehitur, ne dicam cum Christo ipsi exaequari, sicut omni scripturæ sacrae fundamento indiget, ita secundum dialecticam rationem solo nititur studio demonstrandi, peccatum naturæ humanæ contradictorie oppositum esse. Ad quam tamen veritatem vindicandam non opus est, ut talia de Adami perfectione morali fingantur, quæ auxilio narrationis de primis hominibus prorsus destituta sunt. Sed sicut omnes notiones theologiæ dogmaticæ usui venientes secundum imaginem filii dei concinnari debent, in quo etiam naturam humanam perfecte repræsentari fides nos certiores reddit, ita etiam plenam cognitionem peccati theologicam non assequemur, nisi id humanitatis in Christi indole conspicuae comparaverimus, unde denum et status primorum hominum et peccatum eorum recte perspicui possunt. Demonstravimus autem supra, delictum modo contumaciæ in filium dei commissum, quippe quod cum plena peccati notione recte efformata conveniat, iræ dei subici, ita ut, quaecunque exempla animi in deum obstinati eiusque iræ obnoxii historia hominum antecedens præbet, nudum peccatum Adami, imprudentiæ et levitati tantum deputentur, ideoque per Christum remissione digna exhibeantur. Itaque non possumus quin opinionem contrariam, qua ira dei iam peccato Adami, et peccato ab eo ad posteros transfusus adiungitur, quantumvis specie orthodoxiæ ornata, attamen conditam ratione parum theologia, acerrime rejiciamus.

2. Deinde ira dei non debet adhiberi ad explicandam vim passionis et mortis Christi, aut

*) Addimus Thomæ verba ea ratione, ut intelligant lectores, si forte ea perperam interpretati simus, id nobis vitio verti non posset, quum auctor ille genere dicendi utatur, sermoni quidem ecclesiastico non inepto, exponeudas vero doctrinæ theologiæ minime accommodato. „Die nächste Manifestation des Zornes“ heißt „an dem Menschen ist die, dass sie in sein Gewissen eindringt und damit das Schuldbewusstsein mit seiner Qual und Pein in ihm wirkt. In dem Schuldbewusstsein also vollzieht sich das Gericht der Verwerfung zunächst innerlich im Menschen; denn es bezeugt ihm nicht nur seine Verwerflichkeit vor Gott, es stößt ihn geradezu von Gott, von dem Angesichte Gottes hinweg. Wie ein Cherub mit dem Flammenschwert treibt es ihn hinaus, wie ein ätzendes Auge blickt es ihn von innen an, wie eine Verkündigung des Fluches tönt es in seiner Seele wieder.“

saltem alia prorsus ratione, quam quae apud theologos quosdam obtinet. Nam Christum dei iram passione morteque tanquam sacrificio pro peccatis placavisse, neque in scriptura sacra praedicatur, neque e notione sacrificii recte diiudicanda concludi potest. Exposuimus supra, et quomodo aliquoties in V. To. sacrificia irae dei et poenitentiae populi electi interposita esse videantur, et qua ratione, ab illis extraordinariis plane diversa, utatur sacrificium Christi secundum apostolorum explanationem. Nam quum sacrificium Christi inter legitimas pro peccatis oblationes deputetur, valere videtur nonnisi ad remittenda peccata per imprudentiam et levitatem commissa, quae iram dei non meruerunt. Quum vero remissionem omnium peccatorum, nullo excepto, fidelibus per Christi sacrificium offerri profiteantur, indicant apostoli, peccata, antequam Christus adfuerit, commissa universa ab ira dei exenita esse, quippe quae comparata ad divinam veritatem in filio dei manifestam et imprudentiam et levitatem exorta sint. Prava igitur ratio miscetur theologiae christianae elementum religionis V. Ti., si statuitur, esse delicta quaedam irae dei obnoxia praeter directam inimicitiam adversus filium dei. Itaque evenit, ut proposito illa theologia de ira dei legitimo quodam sacrificio placata neque N. neque V. To. consentanea sit. Quominus autem hoc universe in theologia christiana doceatur, prohibet deinde mea quidem sententia id, quod, si qua dei ira sacrificio Christi averti sive placari recte diceretur, hoc sane ad fideles solos referri posset. Nam quod ad contumaces in deneganda Christo fide attinet, debet doceri, iram dei contra illos per Christi mortem confirmatam esse, secundum 2 Cor. 2, 15. 16. Si quis igitur theologus suae rationi insisteret, ut sacrificium Christi ad placandam iram dei valere doceret, is deberet ex notione sacrificii biblica etiam id evincere, Christi morte iram dei etiam confirmatam esse. Quae res, quae quomodo expediri possit, non video, offert novum argumentum ei sententiae, irae dei in efformanda doctrina de sacrificio Christi rationem non posse haberi.

Sed ut sententia, cui nunc contradicimus, accuratius diiudicetur, ex re erit fundamentum pendere, in quo illa condita est. Refertur enim ad id axioma, normam primitivam inter deum et genus humanum intercedentem esse legem dei universalem, viribus humanis explendam aut divinis poenis conservandam. Hanc regulam secuti sunt, qui postulant, ut Christus poenas toti hominum generi debitas persolverit, ne deus gratia per illum peccatoribus oblata a norma cum hominibus agendi primitiva discessisse videatur. Contra hanc autem coniecturam multa eaque validissima argumenta exstant. Nam quantopere in illo axioma tota vetustioris theologiae dogmaticae forma nititur, tantopere ab indole revelationis divinae recedit. Nolumus quidem iniciari, legem Christi universalem de diligendo deo proximoque speculum iustitiae, imo essentiae dei nobis esse; sed id acerrime obtinemus, demum, sicut in edenda hac lege finem voluntatis suae hominibus patefaciendae assecutus est, ita exordium inde non fecisse. Non ignoramus, divulgatam inter theologos eam opinionem esse, hanc legem iam significatam esse Adamo, quippe cui deus vetaret, ne fructus arboris ederet. Sed mirum in modum errant, qui huic interdicto specialissimo legem agendi universalem substituere conantur. Deberemus porro plane inmemores esse disciplinae Paulinae, si approbaremus, legislationem antecessisse exhibitioni gratiae, qua deus sobolem Abrahami elegit. Inverteremus tandem ordinem operis Christi minime obscurum, nisi intelligeremus, eum prius vim gratiae divinae sibi insitam ad condendum dei regnum exseruisse, quam fidelibus legem diligendi dei proximique perfectam explicaret. Neque cuiusquam iudicium subterfugiet, per Christum demum legem universalem dei hominibus propositam, per Moysen tamen legem modo particularem singulari populo datam esse. Itaque comparatione manifestae historiae revelationis divinae corrumpit illa imaginatio vetustioris theologiae sollemnis, quantumvis rationi competere videatur. Praeterea hoc quoque argumentum refellitur. Indoles legis divinae ab auctoritate cuiuscunque humanae legis ita discernitur, ut, quum homo

cam expleat, voluntati certae personae obediat, dum legibus humanis voluntatem quandam universalem subesse fingatur, certis personis non alligatum. Ut ergo efficiantur ea, quae voluntas dei ab hominibus postulat, necesse est, ut providentia erga homines manifestata deus se ipsum, quali sit auctoritate, exhibuerit. Itaque providentia specialis, qua deus Abrahami solemem elegit, et foedus cum ea iniit, nititur lex particularis huic populo data. Providentiam deinde specialissimam, qua deus paternum anorem peccatoribus per Christum ostendit, sequitur lex universalis, fidelibus ex quavis natione oriundis proposita. Ideo etiam interdictum specialissimum, quod primus homo accepit, id sibi voluit, ut auctoritas dei in eum constitutur, quam deum firmatam institutiones recte agendi exceperant, si Adam auctoritatem dei servasset. Itaque providentia specialis, non vero legis universalis ratio normam manifestae inter deum hominesque rationis continet, quam ut intelligant theologi necesse est. Hoc tandem ea re confirmatur, quod peccatum hac appellatione proprie dignum secundum scripturam non recte definitur tanquam transgressio legis. Sed quatenus iram dei mereat, demonstravimus uberius, id cerni in voluntate providentiae dei specialis adversa, i. e. auctoritati legislatoris ipsi renitente. Itaque ea tantum legis transgressio proprie peccatum censetur, quae ad offendendam auctoritatem dei legislatoris, speciali erga hominem providentia exhibita constitutam, ascenderit. Ex his omnibus, quae exposuimus, nobis videmur probasse, nulla regula divinae revelationi insita eum niti, qui postulaturus sit, Christum poenas ab ira dei descendentes solvere debuisse, ut divinae legi universali satisfaceret, priusquam gratiam dei hominibus firmare posset.

3. Irae dei locus in doctrina theologia de eius iustitia vindicandus est. Iustitiam dico, non sanctitatem. Nam nisi in efformanda theologia christiana prorsus discedas a ratione scripturae sacrae, non poteris praetermittere observationem supra allatam, sanctitatem dei alligari tam arcto foederi cum gente Israelitarum instituto, ut deus non amplius sanctus praedicetur, ex quo per Christum ad universum hominum genus se convertit*), et in vocandis et regenerandis quibuscunque singulis hominibus spiritum suum sanctum exhibuit. Refertur autem ira dei ad eius iustitiam, qua significatur, deum in agendo cum hominibus sibi constare, sive manifestationes voluntatis eius hominibus datas convenire cum summo ipsius fine. Cui rei competit, denique iustum esse cognosci tum eo, quod societatem cum hominibus condit, quae secundum gratiam eius ad salutem peccatorum valet, tum quod peccatoribus, deuegantibus deo societatem, vel contumaciter ei officientibus, iram inferit. Qua duplicitate iuste agendi quis est, qui offendatur? Sed tamen quin effectus talis de deo praedicatur, multi sunt, qui dubitent. Non male quidem Lactantius disputavit (*l. c. cap. XVII.*), iram deo non tribui tanquam cupiditatem doloris rependendi, sed tanquam eum animi motum, quo etiam homines iustissime surgant, ut disciplina servetur, mores corrigantur, licentia comprimitur. Sed quum inde pergat, iram, quae ad correctionem vitiorum pertineat, nec homini adimi debere, nec deo posse, quia et utilis sit rebus humanis et necessaria, timemus, ne comparationem nostrae rei inutilem instituerit. Nam ira dei, ubicunque in historia sacra V. Ti. commemoratur, nullibi ita ad correctionem vitiorum refertur, ut vindictae species evitetur, quae homines saltem non docet; exempla potius irae dei illic obvia, quantumvis ad corrigenda vitia tendant, ad emendandos tamen peccatores, qua causa sola homines irasci decet, non referuntur. Iusta enim in hominibus ea ira est, cui tristitia et misericordia miscentur,

*) Bis tantum in N. To. nomen dei sancti occurrit, primum in epistola prima Petri 1, 15. 16, ubi verba Lev. 19, 2 laudantur et Christianis adaptantur, quos Petrus populo foederis veteris inseri supponit. Tum dominus ipse apud Iohannem 17, 11 patrem sanctum alloquitur ea sententia, ut necessitudinem sibi cum deo propriam significet. Quoties ergo haec a regula supra posita discedunt, tantopere ei non contradicunt.

quod optime illustratur verbis Marci (3, 5) de Christo usurpatis: *περιβλεψάμενος αὐτοὺς μετ' ὀφθαλμοῦ, ἀλλ' ἐκποιήσας ἐπὶ τῇ παροργιστῇ τῇ καρδίᾳ αὐτῶν*, — sed in deo ira, quando cernitur, a misericordia prorsus separata est. Itaque fieri non potest, ut iram dei tanquam affectum eius animo insitum definiamus et defendamus. Nam si rationem V. Ti. praesertim habemus, non possumus neque speciem studii partium suarum a deo amovere, neque ideo attributum illud dei defendere, sin comparamus iram divinam cum indole irae hominum iustae, tantum deest ad eius imaginem mente concipiendam, ut eam non possimus distincte definire. Nam si secundum exempla rerum humanarum tantum de iis licet iudicare, quae in deum cadunt, aut ira divina a iustitia abhorre videtur, quia deus iratus, ut emendetur homines, non curat, aut nostram comprehensionem prorsus excedit, si eam a misericordia alienam, simulque iustissimam praedicare debemus. Quae in re tamen memores sumus cum Luthero (*Enarratio in Genesin ad cap. 6, 5*) eius regulae, ut tales quaestiones vitemus, quae nos protrahunt ad solum summae maiestatis.

Itaque propter fines, quibus humana mens circumscribitur, reantiaius quidem solvendae ei quaestioni, quae ad affectum animi divini definiendum spectare videtur, sed effectus irae divinae sollemnes recte considerati multum facient ad iustitiam divinae voluntatis illustrandam. Hoc dicimus, solvi non posse cogitatione theologica eam quaestionem, quid sit ira in deo; attamen plurimum nostra interest diiudicare, quid in ordine revelationis divinae cognoscendo ira dei significet. Ita observatur summa cogitationis theologicae regula antea commemorata. Neque vero fortuito accidit, ut ab iisdem theologis ira dei ad formam iustitiae retributivae immobilem sibi constanter redigeretur, qui in lege expressum primitus inter deum hominesque intercedere finxerunt. Consentaneum enim huic exemplo humanarum rerum esse videbatur, ut iudicium dei laesiones legis suae vindicantis etiam a specie studii partium liberaretur, quo iustitia eius perturbari posset. Hoc summo opere cum decere videbatur, quippe qui legislator et iudex esset, simul autem a parte diversa staret, quam quae ab hominibus obtinebatur. Error eo commissus, quod interiecta iuris regula deum cum hominibus oaequabant, ita videbatur compensari, ut negato quovis voluntatis affectu super homines eveheretur. In neutra tamen re schola, quae dicitur orthodoxa, quippe quae iurisprudentiae theologiam superstruere tentaret, veritatem revelationi divinae insitum et in libris sacris patentem assecuta est. Neque iuvabit recentiores huius scholae sectatores, quod dignitatem irae divinae contra vetustiorum doctrinam de deo nimis tenuem nimisque simplicitate laborantem vindicare student, nisi eo procedunt ut intelligant, rationem primitivam, quam inter deum hominesque ponunt, nimis gravi errore laborare. Nam iurisprudentia illa, quam primus Anselmus palam et consulto in theologiam introduxit, id efficit, ut deo comparato cum hominibus finis tantum individualis aut particularis viadicetur, nunquam autem finis eius summus et absolutus collustretur. Quum vero religio christiana ad summum et absolutum dei finem per filium eius hominibus patefactum et representatum tendat, patet, omnes iurisprudentiae regulas a theologia removendas esse, si officium huic disciplinae proprium recte exsequi volumus.

Demonstravimus autem supra, rationem dei cum hominibus communem versari in providentia eius exhibita, praesertim vero rationem dei cum Christi fidelibus niti providentia eius specialissima, quia illos per Christum vocet perque spiritum sanctum regeneret. Itaque peccatum, hac appellatione plene dignum, quod iustam dei iram provocat, neque ullam remissionem adipisci potest, cernitur in deneganda vel rursus abiicienda fide in Christum. Deinde vero omnia mala, quae fidelibus accidunt, sive propria eius delicta sequuntur, sive a communi humani generis statu ad unumquemque descendunt, non amplius speciem poenae a iudice inflictæ, sed castigationis a patre immissæ prae se ferunt. Utrunque religio christiana normas iurisprudentiae excidit.

Nam ius saltem criminale cuique delicto poenam suam sistit, non vero talem, quae et respiscen-
tiam et conversionem hominis puniendi excludat, quoniam index humanus ab intimo animi motu
iudicando se abstinere, et gratia principis remitti non possit. Itaque quum iurisprudentia theo-
logiae quam dicunt orthodoxae inhaerens cursum suum, frenis religionis christianae abiectis, ad
finem explevisset, sectatores disciplinae rationalisticae non potuerunt comprehendere, neque deum
fideles non punire, neque cuiquam non posse delictum condonare. Inde manaverunt etiam in
theologiam disceptationes illae, utrum poena in retribuendo delicto finem assequatur, an ad emen-
dandam peccatoris voluntatem tendat, quae, quum minime ad religionem et ad theologiam per-
tineant, cultoribus iuris criminalis relinqui debent. Theologia enim non debet agnoscere nisi
castigationem dei patris, quae ad emendandos fidelium animos paratur, et iram, quae in ex-
stinguenda vita morali infidelium demum acquiescit. Utroque modo autem repraesentatur diffe-
rentia inter ius legi cuidam alligatum et religionem christianam. Nam leges tanquam normae
iuris instituntur ad disponendos et servandos hominum fines individuales vel particulares; sed
ordo rerum humanarum, qui religione christiana comprehenditur, et quem theologia interpretatur,
in exsequendo fine dei summo et absoluto versatur. Quem qui sequitur inter homines, ita ut
vitam per fidem Christo habitam secundum ipsam consulto componat, a poena quaque dei iudicis
exemptus est, et castigatus potius a patre deinceps remissionem peccatorum et adiumenta vitae
moralis experitur. Qui vero illi ordini per Christum manifestato se subicere denegaverit, is
tanquam irae divinae traditus ex societate vitae vere humanae, quippe fini dei summo alligatae,
extirpatur, nulla salutis spe relictæ, quantumvis eius vita exteriori honore et bonorum copia or-
nata sit. Et quod in hac causa singulis hominibus a deo propositum est, hoc etiam de populis
suspicari nobis licebit, quatenus in talibus rebus fidei religiosae subiectis iudicii certitudo homi-
nibus permissa est. Etiam si igitur ira dei tanquam affectus animi divini modum cogitationis hu-
manae excedit, possumus ex effectibus eius, quas scriptura sacra testatur, recte perpensis eam
definire tanquam certum argumentum iustitiae divinae ab humana diversae,
quatenus valet ad defendendum adversus homines contumaciter deo fidem
denegantes finem eius summum et absolutum, per Christum cum genera hu-
mano communicatum.





